

2 Corintios

Mamabuinore coyuiyebu Pablo bácu ũi toivaicōjeiye báquede yóbocayoca paperayocare Corinto āmicuriimarocavu Jesúre ju aipōevare. Pablo bácu judíovacacu bácuvacari, Jesús ũi yávaiye méne beorí coyucōjeimū marejaquémavu, coyucuyū ũi yávaiye méne judíova ānevure, judíova ne ju abe boje ũi coyuiyede. Lucas bácu coyurejaquemavu Pablo bácu borore Hch 7:57-8:1, 9:1-31, 13:1-28:31, aru ũi cuede Corinto āmicuriimaroi 18:1-18. Javede Pablo bácu toivacaipōecu bácu toivaicōjeneaquemavu pucayoca ũi paperayocare Tesalónica āmicuriimarocavure aru ũi mamayoca paperayocare Corinto āmicuriimarocavure. Pablo bácu coyurejaquemavu ũre toivacaipōecu bácu aipe ũi toivacaquie báquede diyocare. Toivaicōjeneaquemavu aipe diyocare āniuju bácarōre 55 d.C., yóbecu ũi cuscunuyede, coyucuyū Jesús ũi yávaiye méne. Majidivū ne dāpiayepe, curejaquemavu Filipos āmicuriimaroi ũi toivaicōjeiyede diyocare (Hch 20:1-2).

Diyocaque Pablo bácu coyurejaquemavu aipe Jūmenijicu “Yópe đajarā muja boropatenbenajivū ji jáinore”, ũi yóboque coyuiye báquede pōevare. Aru coyurejaquemavu aipe ũvacari Jesús ũi yávaiye méne beorí coyucōjeimūre, bueirpōeva borocurivū ne cue báque boje Corinto āmicuriimaroi Jesúre ju aipōeva jēneboi. Ina bueirpōeva borocurivū ũbenina coyurejaquemavu aipe yávaiyede, Jūmenijicu “Yópe đajarā” ũi yávaiye jāve āmene. Aru “Pablo āmemi Jesús ũi yávaiye méne beorí coyucōjeimū” ũbenina arí coyurejaquemavu. Diyoca coricai Pablo bácu Jesúre ju aipōevare jícōjeneaquemavu jecubevūva ne cuvaequede cue cuvabevure, ne cadatenajipepe ayū náre (caps. 8-9).

Pablo ũi meaicōjeino Corintocavure (Hch 18.1)

1 ¹Yū, Pablo, toivaicōjeivū apesure iyoca paperayocare. Meaicōjeivū muja cōjijivaivū Corinto āmicuriimarocavu Jūmenijicui pōevare aru caivū apevū Acaya āmicurijoborōcavu Jūmenijicui pōevare máre. Jūmenijicu beorí epeibi yure Jesucristoi yávaiye méne beorí coyucōjeimaracacure. Timoteo máre, majesu ũi ju aipe boje Jesúre majapedeca, meaicōjeimi mujare. ²Majepacu Jūmenijicu, maje jabocu Jesucristomaque, mearo đacajacurí mujare bojecubeda ũi me boje. Aru torojurí cure đajacurí mujare máre cārijimevūva.

Maja cadateimara maje nājijyede (1 Co 15.32)

³Jínajarevū mearore Jūmenijicure, maje jabocu Jesucristoi mearore jímuere,

jípacure máre. Majepacu Jūmenijicu cōmaje āroje jáimi majare cainumua. Aru cadateibi majare cainumua, ũi parure đaiye boje majare maje ũmei. ⁴Cainumua maje nājijyede, majepacu Jūmenijicu parure đarí maje ũmei, cadateyube majare, majacapuravū maje cadatenajipepe ayū apevū nājivure. Yópe ũi parure đaiyepere majare, nopedeca maja parure đavivū apevure máre. ⁵Yópe Cristoi urarō nājijye báquepe, nopedeca maja máre urarō nājivūbu. Aru yópe Jūmenijicui urarō cadateiye báquepe ũre, nopedeca urarō cadateyube majare, maje cue boje Jesucristoque cūinávure. ⁶Nūja nājivūbu, buojarājivū cadateivū mujare, muje parurājipepe aivū muje ũmei aru muje meadaimara marajiyépe aivū máre. Jūmenijicui cadateiyede nūjare ũi parure đaiyede nūje ũmei, coreóvare đalibi nūjare aipe đaiye jaurōre nūjare, nūje cadatenajipepe ayū mujare,

parure ðarí mujare muje úmei. Que baru muja máre muje ñájiyede napini buojarájivubu muje ñájinajijárvavu baquinói yópe ñuje napiyepedeca ñuje ñájiyede. ⁷Majivu ñuja muje ñájiyede yópe ñuje ñájiyepedeca, Jümenijicu cadateni parure ðacuyure mujare máre muje úmei, yópe üi cadateni parure ðaiyepedeca ñujare ñuje úmei. Que baru jáve napini coreivubu ñuja me baju vaiquiyepa aivu mujare.

⁸Muja, ñujevu, uvu ñuja muje majinajiyede ñuje napiye báquede ñájiño uraró bajure no Asia ámicurijoborói. Pare ámeno ñuje ñájiye boje, ye napini majibetecará ñuja. “¿Jáve yainájivu bária?” arí dápiaríducará ñuja. ⁹Jümenijicu nópe arí dápiacójeñume, ñuje napini corebenajiyepa ayu ñuje baju cadatenajiyede. Quénora jáve napini coreiye jauteavü ñujare Jümenijicure, ñai nacovañu ina yaivu bávavure yainore jaruvarí, üi cadatequiyepa ayu ñujare, yaijörorivu bávavure. ¹⁰Aru Jümenijicu jáve meadame ñujare iye ñuje yaijöroró mácaróre jocarí. Aru ñujare meadacuyume ñuje ñájiyede jaruvarí. Que baru jáve napini coreivubu ñuja úre. Majivu ñuja jáve meadacuyure ñujare ñuje ñájiyede jaruvarí cainumua. ¹¹Que baru uvu ñuja muje cadatenajiyepa aivu ñujare muje jëniaiyede Jümenijicure ñujare boje. Obedivu pöeva ne jëniaiyede Jümenijicure ñujare boje, mearo ðacacuyume ñujare. Aru ne jáiyede üi mearo ðacaiyede ñujare, obedivu pöeva torojuede jínajarama úre.

**Aipe teni Pablo üi jácunumeno
mácaró Corintocavure yópe üi aiyepedeca
báquedepedeca**
(Hch 18.5, 19.21; Ef 1.4)

¹²Apevu mujacavu übenina arí coyuríduyama ñujare borocurivure. Übenita ne que aiyepedeca jáve ámevu. “Ðadavü maja yópe ðaiye jauróre majare Jümenijicure jáinore”, ñuje arí dápiayepa torojurivubu ñuja. Coreóvaivubu ñuja cainumua ðarí

cómajivure jujovabevüva aru ámeno cubevüva máre pöeva Jesúre ju abevüque aru püeno baju muja Jesúre ju aipöevüque. Übenita nópe ðarí buojabevü ñuja ñuje majiéque. Quénora Jümenijicu nópe ðarí majide ðaibi ñujare bojecubeda üi parué majiéque. ¹³⁻¹⁴Cainumua ñuje paperayocare, ñuje toivaicójeiyede apesure mujare, jári boroteni coreóvarí buojajebu muja. Übenita caride caiye ñuje toivaicójeiyede apesure coreóvabevüreca cáreja, jáve napini coreyubu yu, muje coreóvarájiyepa ayu caiye iye ñuje toivaicójeiyede apesure mujare. Que baru maje jabocu Jesú copaidaquiyede caivu maja torojurájaramu. Mujacapuravu torojurájaramu ñuje bueiye báque boje mujare Jesús üi yávaie méne. Aru ñujacapuravu torojurájaramu muje ju aiyepedeca boje üi yávaie méne.

¹⁵⁻¹⁶Ji coreóvaie boje diede, arí dápiaríducacu jácunucuyure muje yebai mamarumü, ji nuiyede Macedonia ámicurijoborói aru ji copaiyede nore jocarí máre, muje cadatenajiyepa ayu yure nure nucuyure pu Judea ámicurijoboróita. Püque ji jácunuiyede mujare, püque Jümenijicu mearo ðacajebu mujare. ¹⁷Yu nópe arí dápiaríduyu bávavacari, ape borore ji jápiaríburu yóboi, oatuvacacu ji dápiainore. Que baru numetevü muje yebai cáreja. Ji nume boje cáreja, apesure mujacavu yópe borocuma yure. “Pablo jujovaibi majare. Ijáravüvavu Jesúre ju abevü, übenina coyüibi. Üi dápiayede üi ðaquiyede üi baju cadateiyurí, apesure ye cadateiyubebi. Maumena üi ju aiyepedeca báquede oatuvaibi, bi acuyü. Que baru pücaümea cubi ü”, übenina adama yure. ¿Ju aivurü muja ne nópe arí coyüinore yurá? ¹⁸Ne nópe arí coyüiye yurá jáve ámevu. Jümenijicu jáinore jáve coyuyubu mujare. Jümenijicu pücaümea cubecu, oatuvabecu, ye übenina arí coyubebi. Jümenijicu “Yópe ðacuyumu” ayu baru, jáve ðayu apa. Aru ñuja máre pücaümea cubevü, oatuvabevü,

ye ũbenina arĭ coyũbevu. Ñũja “Yópe ðarãjaramu” aivu baru, jáve ðaivu apa. Que baru yũ jũ ayũ baru apede, ye oatuvabevũ. ¹⁹Jãvetamu no, ji ðaiye boje yópe Jũmenijicui mácu Jesucristoi ðaiyepe. Javede Silvano, Timoteo, aru yũ máre coyũcarã mujare Jesús ũi yávaiye méne. Jesúrecabe pũcaũmea cubecu, oatuvabecu, ye ũbenina arĭ coyũbecu. Cainũmua “Yópe ðacũyũmu” arĭ coyũyũ, jáve ðayũbe yópe ũi aiyẽ báquepedeca. Jũ ayũ baru, ye oatuvabebi.

²⁰Jesucristorecabe jũ ayũ caiye Jũmenijicu “Yópe ðacacũyũmu pœvare”, ũi aiyẽ báquede. Ũrecabe ðayũ caiyede yópe Jũmenijicui aiyẽ báquepedeca, mearo ðacacũyũ caivu majare ũre jũ aipœvare. Que baru cainũmua maje mearore jíyede Jũmenijicure, “Cristoi ðaiye báque jávemu. Quédecabu”, arĭ coyũvaivũbu Jesucristoi paruéque. Aru Jũmenijicu torojubi dieque.

²¹Jũmenijicurecabe parũre ðayũ ñũjare aru mujare máre maje ũmei, maje cuede Jesucristoque cũinávũpe. Ũrecabe beoyũ bácu majare ũ jinava. ²²Ũrecabe ðaroyũ bácu majare ũi Espĩritu Santore, ũi cuquiyepe ayũ majaque, jáðovacũyũ majare Jũmenijicu jinava. Aru ũrecabe majide ðayũ majare ðacacũyũre caiye iye méne yópe ũi aiyẽ báquepedeca, ũi ðaroyũ báque boje ñai Espĩritu Santore.

²³Caride yũ toivaicœjecuĩyũ apesũre mujare, coyũcũyũ aipe teni oatuvayũ básũre “Yópe ðacũyũmu”, ji arĭ dápiaiye báquede. Jũmenijicuvacari majibi jáve ji coyũiyede. Ũrecabe majicũ caiye ji dápiaiye de ji ũmei. Yũ ñumetevũ cáreja mujẽ ĩmaro Corintoĩ, ji jaraiyũbe boje mujare. ²⁴Ñũja jaraiyũ baru mujare mujẽ ðaiye boje, yópe jabova parũrivũ ne cœjeiyere, ñũja jũ aicœjeiyũbevu mujare aipe jũ aiyẽ jaurœre mujare. Mũja me coreóvaivũbu aipe mujẽ jũ aiyede Jesúre ðajocabevũva, parũrivũ mujẽ ũmei. Quénora jaraiyũ baru mujare, cadateiyũrivũbu mujare, mujẽ torojurãjiyere aivu mujẽ ũmei.

2 ¹Yũ ñũũ maru mujẽ yebai caride, jarajebu mujare. Aru

jararu mujare, chĩojebu mũja. Ũbenita ñũiyũbevu yũ mujẽ yebai, mujare chĩore ðacũyũ bediõva cojedeca. Que baru copainũmetevũ yũ cáreja nore. ²Mũjarecabu torojũre ðaivu yũre. Que baru yũ chĩore ðayũ baru mujare, yũ máre chĩojebu. Caivu maja chĩojebu, yũ ñũũ maru mujẽ yebai caride. ³Que baru toivaicœjecacu apesũre mujare apesũre paperayoca bácarœre, jaracũyũ mujare, mujẽ meadarãjiyere ayũ mujẽ ðaiyede ji ñuquiye jipocamia, ji jaraiyũbe boje mujare mujẽ jivateinoi. Ji jaraiyede mujare, torojubevu yũ. Ũbenita mũjarecabu yũre torojũre ðajũrorivũ baju. Que baru yũre chĩore ðaiye jaubevu mujare. Me coreóvaivũ yũ iyede. Mujẽ torojubedu, yũ máre torojubevu. ⁴Chĩõũ baju ji orique toivaicœjecacu apesũre no paperayoca bácarœre. Parẽ ñãjicacu yũre jaraiye jauẽ boje mujare. Ũre toivaicœjemetecacu, chĩore ðacũyũ mujare. Quénora ũre toivaicœjecacu, mujẽ majinajiyere ayũ pare ji ũede mujare.

**Pablo ũi ãrũmetecœjeino
Jesúre jũ aipœvare apesũ ũi
ãmecoroino mácarœre ũre**

⁵Ñai mujẽ yebai cucũ ãmecoroyũ básũ yũre chĩore ðabeteame yũre cũinácũva. Quénora mujare máre chĩore ðaquemavũ ũ. O, “Apevu mũjacavũre chĩore ðaquemavũ”, aiyẽ jauvũ yũre, ji cœmaje ãroje jáiye boje ũre. ⁶Iye mũjacavũ obedivũ mujẽ ñãjine ðaiye báque ũre, ũi ãmeina teiye boje, ũarõ bajubu. Ape ñãjiye jaubevu ũre. Quénora ðajocajará mujẽ ñãjine ðaiyede ũre. ⁷Que baru caride ãrũmetejarã ũi ãmeina teiyede. Ũre cadateni, parũre ðajarã ũi ũmei. Que ðaru, ũ ðajocabecũyũme ũi jũ aiyede Jesúre, ũi pare chĩoye boje mujẽ ñãjine ðaiyede ũre. ⁸Parũrœca jẽniaivũ mujare mujẽ coyũiyede aru mujẽ jáðovaiyede máre bediõva cojedeca ũre mujẽ ũmũre. ⁹Toivaicœjecacu apesũre no paperayoca bácarœre, majicacũyũ mujare ñãjine ðaiye jaurœre ñai ũmũre. Mũja cainũmua jũ

aivure yure majiyutecacu yu. Torojavu yu, majicu mije daiye báquede yópe ji majicaiye báquipedeca. ¹⁰Muje arumetedu ñi ámeina teiyede, yu máre arumetecuyumu ñi ámeina teiyede. Yure arumeteiye jauéde apecui ámeina teiyede, arumeteyubu diede mujare boje, caivu mja mje curájiyepe ayu me mje baju, aru Cristore boje, ñi jáiye boje caiye ji daiyede, aru ji dápiayede máre. ¹¹Maje arumetedu apecui ámeina teiyede aru cadatedu úre, ñai abujuvai jabocu, Satanás, majare ye buojabebi dápaicójeñu aru ñaicójeñu máre, yópe ñi dájueroepe maje arumetebedu apecui ámeina teiyede aru cadatebedu úre. Me majivu maja aipe árojae ñai jujovayu ñi daiyede.

Pablo ñi cãrijino ñi cuede Troai
(Hch 20.1)

¹²Ji coyucunuiyede Cristoi yávaiye méne, eacacu Troas ámicurriimaroí. Obedivu nócavu jápiayuriduima diede. Que baru maje jabocu Cristore memecayu buojariducacu. ¹³Ubenita pare cãrijinũ batecácu mujare. Majecu Titore, ji jaroimu mácure mje yebai, “Úre sorucuyumu yui”, arí dápiariduyũ batecácu. Ubenita úre eabtecacu nore. Que baru, “Nũñũmu” ji aríburu yóboi nócavure, etacacu nore jocarí, vocunucuyũ Titore Macedonia ámicurijoboróí.

Cristo ñi vainí ture ñaino
majare maje mavure

¹⁴Torojuede jínajarevu Jãmenijicure. Maje cue boje Jesucristoque cünávũpe, cainũmũa majare vainí ture ñayube Jãmenijicu maje mavure, ina majare coyucójemenudivure Jesús ñi yávaiye méne. Coyure ñayube Jesús ñi yávaiye méne caino maje nuino, obedivu pöeva ne coreóvarãjiyepe ayu úre, yópe pöescu bicovaiyepe mumijuede, eaquiyepe ayu cainoi. ¹⁵Jãmenijicu me baju jáñũme maje coyuyede Jesús ñi yávaiye méne cainoi. Yópe caivu pöeva ne víyepe mumijuede ne bicovaiyede, nopedeca

caivu pöeva jápiaivu maje coyuyede Jesús ñi yávaiye méne coreóvaivubu diede. Apevu diede jápiaivu meadare nuivubu cavaró mearo Jãmenijicui curóí, aru apevu bíjare nuivubu Jãmenijicure jocarí toabo cüiméboi. ¹⁶Ina Jesús ñi yávaiye méne jápiarí ju abevũ ubema maje coyuyede yópe pöeva ne víyũberpe áme corajuede. Maje coyuyede boje, nácapũravũ coreóvaivubu ne baju yaináivure aru bíjare nurajivure Jãmenijicure jocarí toabo cüiméboi. Ubenita ina Jesús ñi yávaiye méne jápiarí ju aivu uma maje coyuyede yópe pöeva ne víyũberpe mumijuede. Maje coyuyede boje, nácapũravũ coreóvaivubu ne baju apurãjivure aru meadare nurajivure cavaró mearo Jãmenijicui curóí. Pöescu cubebi ñi baju coyuyede majicu iye yávaiyede, yaidé ñayũ apevure aru apure ñayũ apevure máre. Quénora maja coyuvubu diede, Jãmenijicui cadateiye boje majare. ¹⁷Obedivu pöeva coyuvubu Jãmenijicui yávaiyede, ñajivu tãuturare yópe cuede jíní bojeaipöevare. Apevu mujacavu ubenina arí coyuriduyama ñjare nápe paivure. Ubenita ne que aye jáve ámevũ. Quénora ñjã Jãmenijicui daroimaramu. Uí coyucójeimaramu ñi yávaiyede ámeno cubevũ ñi jáinore, ñjã cue boje Jesucristoque cünávũpe.

Pablo ñi coyũno Jãmenijicu “Yópe ñajarã mja, boropatebenajivu ji jáinore”, ñi yóbocaró coyũno mácaró pöevare Cristoque
(Ro 8.29; Gá 4.19; Fil 3.10)

3 ¹Apevu pöeva ámecororãjichũma ñjare bedióva cojedeca, ñjã nópe aye boje. “Pablojã ‘¿Meara márica?’ aivubuya”, ubenina aivureca, ne nópe ámecoroie ñjare jáve ámevũ. Javeita ñjare coreóvaivũ mja. Que baru apevure paperayocare toivacaicójeiye jaubevu ñjare, mje coreóvarãjiyepe aivu ñameja ñjare aru ye paruéde cvarivure. Iyepe paivoca paperayocare toivacaicójeiye

jaunu arevu pōevare. Ūbenita mujare jādovaiye jaubevu ñujacapuravure paperayocare, muje majinajiyeye aivu ñujare Jūmenijicui daroimarare. Aru mujare toivacaicōjeiye máre jaubevu ñujacapuravure paperayocare, arevu ne majinajiyeye aivu ñujare Jūmenijicui daroimarare. ²Mujavacari iyepe paiyoca paperayocape paivubu. Que baru jaubevu ñujare paperayocare, ñameja ñujare aru ye paruéde cvarivure coyuiyocare. Caivu pōeva mujare jáivu majinajarama jáve ñujare Jūmenijicui daroimarare aru ñi paruéde cvarivure, muje oatuvaiye báque boje muje ðaiyede, ñuje coyuiye báquede mujare Jesús ñi yávaiye méne. Mujare pare unu ñuja. Que baru mujarecabu paperayoca Cristo toivaino mácarōpe paivu ñuje ūmei, ñuje ārumetebenajiyeye aivu mujare. ³Cristo ūbi pōevare ne járajiyeye ayu caiye iye ñi mearo ðacaiyede mujare, ñi oatuvare ðaiye báquede mujare, muje ju aiye boje ñi yávaiye méne, ñuje coyuiye báquede mujare. Que baru mujarecabu paperayoca “Mearatamu na”, ñi arí toivaino mácarōpe mujare aru ñi jícōjeinope paivu ñujare, ijārvucavu ne coreóvarājiyeye ayu ñi paruéde. Ūbenita toivabeteame ñeminicoroque paperayocarā, aru buraiyoque cūravearā máre. Quénora oatvaicōjequemavu ñai Espiritu Santore mujare, muje ūmene aru muje ðaiyede máre.

⁴Jāve majidivubu ñuja me nuriéna coyuvure Jesús ñi yávaiye méne, Jūmenijicui daroie báque boje ñujare aru Cristo beorí coyucōjeiye báque boje ñujare. ⁵Ñujavacari Jesús ñi yávaiye méne nuriéna coyurí ye majibevu ñuje baju majiéque. Quénora Jūmenijicurecabe coyurí majide ðayu ñujare diede me nuriéna. ⁶Jūmenijicūvacari majide ðarejame ñujare, ūre memecaivure, ñuje coyurājiyeye ayu “Yópe ðajarā muja, boropatebenajivu ji jáinore”, ñi yóboarō coyūno mácarōre pōevare Cristoque. Toivacaino mácarō āmenejaquemavu iye ñi yóboarō coyūno mácarō

Cristoque, pōeva maje majinajiyeye ayu aipe ðaiye jaurōre majare. Quénora ñi yóboarō coyūno mácarōque Cristoque Jūmenijicui Espiritu Santo majide ðayu aipe ðaiye jaurōre majare. Jūmenijicui ðaicōjeiye ñi toivacōjeiye báqueque Moisés bācure pōeva yaivu bācavure ne ūmei coateimara májebu Jūmenijicure jaruvarí, maje ðaiye majibe boje yópe ñi ðaicōjeiye. Ūbenita Jūmenijicui Espiritu Santoi ðaicōjeiyeque pōeva apurivubu maje ūmei, ñi ðare ðaiye boje majare yópe ñi ðaicōjeiye.

⁷Javede “Yópe ðajarā muja, boropatebenajivu ji jáinore”, Jūmenijicui arí coyurejaquemavu pōevare, ñi coyuiye báquede ñi ðaicōjeiye Moisés bācure. Iye ðaicōjeiye toivaicōjenejaquemavu cūravearā. Dinumu mácarōre paredca Jūmenijicui meacu baju ñi parué pēorejaquemavu. Que baru Moisés bācui jiva máre pēorejaquemavu. Iye pēoie bíjare nuiyedeca, ānina Israel bācui pāramena mácavu ye jáivu buojabedejaquemavu ñi jivare, pare pēoieque boje. Que teni Jūmenijicui jádovarejaquemavu meacu bajure ñi parué pēoieque, ñi majide ðaiye báquede pōevare aipe ðaiye jaurōre náre ñi ðaicōjeiyeque, iye coatede ðaiye pōevare ūre jaruvarí. ⁸Que baru pūeno baju jádovarejaquemavu meacu bajure ñi parué pēoieque, ñi majide ðaiyede pōevare aipe ðaiye jaurōre majare ñi Espiritu Santoque, ñai arupe ðayu majare maje ūmei, maje curājiyeye ayu Jūmenijicūque cainumca.

⁹Jūmenijicui, ñi javecarō coyūno mácarōque Moisés bācūque, pōevare boropateivure jári, ñajicōjenejaquemavu náre. Ūbenita ñi yóboarō coyūno mácarōque Cristoque, pōevare boropatebevure jári, meadarejaquemavu majare. No ñi javecarō coyūno mácarōque Moisés bācūque, jádovarejaquemavu meacu bajure ñi parué pēoieque. Ūbenita yo ñi yóboarō coyūno mácarōque Cristoque,

pueno baju jádovarejaquemavu meacu bajure ñi parué pëoiyeque. ¹⁰ Ñi yóboque coyuquiye jipocai, no ñi javecarõ coyuino mácarõ parurejaquemavu. Ñbenita yo ñi yóbocarõ coyuino mácarõ Cristoque pueno baju parurõtamu. Que baru yóboquede ñi coyrĩburu yóboi, no javecarõ ye parubevu. ¹¹ Jümenijicui coyuiyede no javecarõre Moisés bácuque, “Cüiquíyebu”, arí dápiarejaquemavu. Ñbenita ñi yóboque coyuiyede Cristoque, “Cüiméquiye”, arí dápiarejaquemavu. No ñi coyuino mácarõ cüiquínoque jádovarejaquemavu meacu bajure ñi parué pëoiyeque. Ñbenita yo ñi coyuino mácarõ cüiméno maquinóque pueno baju jádovarejaquemavu meacu bajure ñi parué pëoiyeque.

¹² Ññje jáve napini coreiye boje Jümenijicu jádovare nucuyure meacu bajure ñi parué pëoiyeque, ññje coyuiyede Jesús ñi yávaiye méne, jidubevüva coyvavüvu diede.

¹³ Moisés bácu, ñai cümañu mácu ñi jivare cuitótecajeque ñnina judíova, Israel bácu páramena mácvu, ne jámenajiyere ayu iye pëoiyede bíjare nuíyede ñ mácvure jocarí, coyrejaquemavu Jümenijicui yávaiyede jávene avenu pëovare obebeñuare. Ñbenita ññjacarüruvu coyvüvu Jümenijicui yávaiyede jávene caivu pëovare cainümu. ¹⁴ Ñnina judíova ye coreóvaivu buojabedejaquemavu ne jári boroteiyede Moisés bácu coyuiye báquede Jümenijicu “Yópe ñajarã muja, boropatebenajivu ji jáinore”, ñi javecarõ coyuino mácarõre.

Aru quédecabu caride máre. Ye coreóvaivu buojabema ina judíova, yópe ne cümaiyepe ne ümene cuitótecajeque. Pu ne cuiyeta Jesucristoque cüinávure, coreóvaivu buojarãjarama na. Cristo quécüra majibi yópe cümaicajede ñni jaruvaiyepe. ¹⁵ Pu carita ne jári boroteiyede Moisés bácu coyuiye báquede Jümenijicui javecarõ coyuino mácarõre ye coreóvaivu buojabema ina judíova, yópe ne cümaiyepe ne ümene cuitótecajeque. ¹⁶ Ñbenita pöescu

ju aiyepe maje jabocu Jesucristore, coreóvaivu buojabi Jümenijicui javecarõ coyuino mácarõre, yópe icaje cümaicajede ñni jaruvaiyepe. ¹⁷ Maje jabocu Cristo cüinávure ñai Espiritu Santo. Aru ácu pöescu cuvacu ñai Espiritu Santore, abujuvai jabocui cöjeimu ñmemi. ¹⁸ Caivu maja curivüvu yópe cuvarepe maje jiva cümamejivare, maje coreóvaíye boje Jesucristore. Yópe jivarü cümamedu jádovaiyepe ñai jáñu nore, nopedeca maja jádovavüvu avenu maje jabocu Cristo meacu baju ñi parué pëoiyede maje cuvarede, maje cue boje éque cüinávure. Maje coreóvare návaiyede ére cainümu, oatüvare návavüvu maja, épe tenajivu. Járvu coapa pueno baju jádovare návavüvu ñi parué pëoiyede maje ñaiyeque. Nópe ñare ñayübe maje jabocu Cristo. Érecabe ñai Espiritu Santo.

4 ¹ Jümenijicu ñi cömaje ároje jáiye boje, ére memecacöjeimi ññjare, ññje coyrãjiyepe ayu Jesús ñi yávaiye méne. Que baru üetubevüva diede coyure nurajaramu ññja. ² Ññje coyuiyede, ye ñabevü meatenajivu ññje baju avenu pueno yópe ññjare ñmecororidüvu ne aiyepe. Ye cuyoje tede ñabevü ññja. Yavenina máre yéde ñabevü ññja. Jujovabevü pëovare. Aru oatüvabevü Jümenijicui yávaiye méne. Quénora caiye Jümenijicui yávaiye méne coyvavüvu yéde yavebevüva, oatüvabevüva, aru jujovabevüva máre. Nópe ñari Jümenijicui jáinore jádovavüvu caivu pëovare ñameja ññjare aru ye paruéde cuvavüvre, ne mearo dápiarãjiyepe aivu ññjare.

³ Avenu pöeva coreóvaivu buojabema ññje coyuiyede. Ñbenita nárecabu quévüra ina bíjare nuívu Jümenijicure jocarí toabo cüiméboi. ⁴ Ññje coyuiyede Jesús ñi yávaiye méne, náre jápiarí eabede ñabi ñai abujuvai jabocu Satanás, ñai jaboteyu ijárvucavu Jümenijicure coreóvabevüre. Pöeva ne jápiarí earí ju aiye iye yávaiye méne yopedecabu ne jájuroe Cristo meacu

baju ñi parué pëoiyede, ñuje coyuiyede diede. Ëbenita yópe jári eabecu ñi jámepe pëoiyede, nopedeca ina pöeva diede ju abevu coreóvabema Cristo, ñai cüináturnu jípacu Jümenijicuque, meacu baju, ñi parué pëoiyede, yópe ne jári eabepe diede. ⁵Ñuja coyubevu ñuje borore, pöeva ne pueðaräjipepe aivu ñujare ne jabovava. Quénora coyuvaiuvu maje jabocu Jesucristore. Ñujacapüravu quénora memecavaivubu mujare, ñuje ðaiyue boje yópe Jesucristoi uröpe. ⁶Mamarumure, Jümenijicui cuedaiye báquede caiyede, ñeminijäravu bácaröre, “Miadájaro” ayu bácu, miadáre ðarejaquemavu Jümenijicu. Ërecabe, yópe miadáre ðaiyeppe maje ümene, coreóvare ðayu meacu baju ñi parué pëoiyeque. Maje coreóvaiyede Cristore, coreóvaivubu Jümenijicu meacu baju ñi parué pëoiyede, yópe maje jájuroepe Cristo meacu ñi jiva pëoiyede Jümenijicui paruéque.

**Jesúre ju aipöeva ne ðaino ñi
paruéque
(Ro 14.10)**

⁷Iye Jümenijicu meacu baju ñi parué pëoiyebu püeno bojecue baju. Ëbenita ñuja coreóvaivubu cvarivure iye parué pëoiyede parubevure ñuje ümei, ñuje bojecube boje, yópe jobojorobu parubebure aru bojecubebure. Que baru Jümenijicurecabe parure ðayu ñujare ñuje ümei, jáðovacuyu caivu pöevare üre parucure caivu püeno. ⁸Apenumua apevu ñujare cãrijovavureca, Jesús ñi yávaiye méne coyuri ye dajocabevutamu ñuja. Apenumua aipe ðaiye jaüröre ñujare, ye majibeureca, apevu ye vainí turí jaruvaivu buojabevutamu ñujare. ⁹Apenumua apevu ñujare ñájine ðaivureca, Jümenijicu ye coatebebi ñujare jaruvarí. Apenumua apevu ñujare ámedaivuvacari, ñujare ye bíjare ðabevutamu na. ¹⁰Caino ñuje nuinoi, ñuje coyuiye boje Jesús ñi yávaiye méne pöeva boarí jaruvaiyuríduivubu

ñujare, yópe apevu ne boarí jaruvaiye báquepe Jesúre. Ëbenita ñuja apurivu cãreja jáðovaiuvu Jesúre, ne boarí jaruvaimu mácure, apucure bedióva cojedeca caride, ñujare cadateyure.

¹¹Cainumua ñuje cuede ijäravure, pöeva jëni jíniduvaiuvu ñujare apevure ne boarí jaruvaríduräjipepe aivu ñujare, ñuje coyuiye boje Jesús ñi yávaiye méne. Aru ñuja apurivu cãreja jáðovaiuvu Jesúre, ne boarí jaruvaimu mácure, apucure bedióva cojedeca caride, ñujare cadateyure. ¹²Que baru pöeva ne boarí jaruvaiyuedeca ñujare, ñujacapüravu coyure núvavubu Jesús ñi yávaiye méne, muje curäjipepe aivu cainumua muje diede ju aiyede.

¹³Ye baju ámevu pöeva ne boarí jaruvaiyue ñujare. Cainumua ju aivubu Jümenijicure. Yópe arí, apecure toivaicöjenejaquemavu Jümenijicu ñi yávaiyede: “Yu ju aivu Jümenijicui yávaiyede jävene. Que baru coyuyubu diede”, arí toivaicöjenejaquemavu. Aru quédeca ñuja máre ju aivubu Jümenijicui yávaiyede jävene. Que baru diede coyuvaiuvu ñuja. ¹⁴Coreóvaivubu ñuja ñi yávaiyede jävene, ñi nacovaiye báque boje maje jabocu Jesúre yainore jaruvarí, apure ðacuyu üre bedióva cojedeca. Que baru coreóvaivubu ñuja nacovacuyure ñujare máre yainore jaruvarí, ñuje apuräjipepe ayu bedióva cojedeca, ñuje cue boje Jesucristoque cüinávure. Aru ñuja mujaque, caivu majare nuvacuyume ñi curóí, maje curäjipepe ayu úque cainumua. Que baru jidubevuvu coyuvaiuvu diede. ¹⁵Ñuja vaivubu caiye iye ñájipepe mujare boje, cadatenajivu mujare. Püeno baju obedivu pöeva ne ju aiyede Jesús ñi yávaiye méne, ñuje coyuiyede, Jümenijicu meadaibi náre ne ámeina teiyede jaruvarí, ñi mearo ðacaiye boje pöevare bojecubeda ñi me boje. Que baru ina püeno baju obedivu pöeva torojuede jínajarama Jümenijicure. Aru úcapüravu püeno baju ne pueðaimu macuyúme, ne püeno baju mearore jíye boje üre.

¹⁶Que baru ñetubevva Jesús ñi yávaiye méne coyure nurajaramu ñña. Jāravva coapa vainíburu, parubede ñivuvacari ñña baju, maje úme parure ñuri, mamaeva oatuvare ñivubu maja. ¹⁷Ñájivureca maje cuede ijāravure, maumena vaiquiyebu maje ñájiyede. Que baru quíjino dápiavubu diede. Aru maje curājiyede cavarō mearore Jūmenijicūque, coreóvarājaramu jāve quíjino bajura iye maje ñájiyede ijāravure. Ūbenita maje ñájiye boje pñeno ñrarō mearo baju cvarājaramu maja cainmua, jāravu cūimējāravu baquinóre. Que baru ñrarō dápiavubu diede. ¹⁸Maja dápiare ñumevu maje ñájiyede, iye maje jári buojaiyede. Quénora dápiare ñivubu iye mearo bajure maje cvarājiyede, cavarō mearo Jūmenijicūi curōi, iye maje jári buojabede cāreja. Iye maje jári buojaiye cūiquiyebu. Maumena vaiquiyebu. Ūbenita iye maje jári buojabe cūimēquiyebu. Cainmua cuquiyebu.

5 ¹Maje baju ijāravucarō yópebu cūrami maje úme curiñamipe. Majidivubu pojequibaju baquinóre maje yayede. Ūbenita no pojeiyede, maja Jesúre ju aipóeva cūvavu apebaju, maje úme curiñamipe. Ūbenita cūrami póeva ne ñaiñamipe āmevu. Quénora Jūmenijicūrecabe cuedayū apebaju mamabajure majare. No baju pojebequiyebu. Quénora cuquiyebu cainmua cavarō mearo Jūmenijicūi curōi. ²⁻³Ūetuivubu maje cuede yo baju ijāravucarōque. Pare napini coreivubu añijāravu, Jūmenijicūi jíquijāravu baquinóre apebaju mamabajure majare. Yópe baquiyébu maje ecoiyepe mamađami cūrami aru maje doiyepe cuitótecaje mamacajede máre, maje cubequiyere ayū yópe pōescu cuitótecaje cubecupe. Que baru maje úme baju cuquiyebu cainmua. ⁴Maje cuede yo baju ijāravucarōque, pare ñájini, napini coreivubu maje cvarājiyede apebaju mamabajure. Yópe pōescu ūbebi cūcu cuitótecaje cubecupe, nopedeca maja ūbevu curivū maje úme baju cubevva.

Quénora ūvu maja Jūmenijicūi oatuvaiyere aivu maje bajure maja yaibévva. Que teni maje baju ijāravucarō pojequibajure oatuvajebu Jūmenijicū, maje cvarājiyere ayū mamabaju pojebequibaju cavarō mearocarōre. ⁵Jūmenijicūrecabe ñai majare meadayū bācu, maje baju oatuvaiyere ayū. Que baru iye maje baju oatuvaiye jāvetamu. Ūrecabe majide ñayū majare, ñacacuyure caino mearo yópe ñi aye báquipedeca, ñi daroiee báque boje ñai Espiritu Santore.

⁶Que baru ye jidubevva aru chōmevva máre napini corevavubu maje cuede cainmua, yo baju ijāravucarōque cubevū cāreja, maje jabocu Cristoi curōi. ⁷Majidivubu aipe ñaiye jaurore majare, maje ju aye boje ūre, majare majide ñayure. Ūbenita ūre jámevu cāreja. ⁸Jidubevva aru chōmevva máre napini corede ñivubu maja. Pñeno baju yayivuvubu maja, curājivū maje jabocu Cristoi curōi. ⁹⁻¹⁰Ūbenita caiyede jocarī, yópe maje jabocu Cristoi ūrópe ñaiyivuvubu maja. Maje cuede ijāravure aru maje cuede ñi curōre máre quénora ñi ūrópe ñaiyivuvubu maja, caivu maja maje nūrajaye boje Cristoi coyūquiyede maje ñaiye báquede méne o āmene ñi jáinoi. Bojedacuyume caivu majare yópe maje ñaiye báquipedeca ijāravure. Maje mearo ñaiye báque boje, mearo ñacacuyume majare. Ūbenita maje āmeno ñaiye báque boje, ñájine ñacuyume majare.

Jūmenijicū ñi cārijimene ñaino majare

(Jn 3.3-7; Hch 16.23; Ro 14.10; Gá 6.15)

¹¹Maje jabocu Cristoi bojedaiyere boje caivu pōevare, ūre pueñaiye jaovu majare. Que baru pōevare ju are ñaiyurīduivubu ñña Jesús ñi yávaiye méne. Ūbenita coyubevu ñña diede, cvarājivū ñña boje méne. Quénora diede coyivubu, pōeva ne ñájimenajiyere aivu ne ju abe boje. Jūmenijicūcapūravū me coreóvayube

ñujare, ñuje dápiayede ñuje ùmei. Que baru majibi ñujare ñujovabevure aru mearo ðaivure. Napini coreivü yu mujare máre nopedeca me majidivure aipe ãrojarivure ñujare. ¹²Bedióva cojedeca ubenina arí dápiabejará muja jí nópe aipe boje mujare coreóvare ðaiyucure ñameja ñujare aru ye paruéde cuvavivure. Quénora mujare torojure ðaiyuríduivübu ñuje ðaiye boje, muje majinajiyepe ayu me ina bueipóeva ãmecorojorurivü ñujare ne coyuiyede. Æmecoioyuríduivübu ñujare, ne ube boje ne jáiyede aipe ãrojarivure ñujare. Ubenita majibema aipe ãrojarivure ñujare ñuje ùmei. ¹³Apevu “Pablojá ãrumevutamu”, ubenina adama. Ubenita ãrumevu ãmevu ñuja. Ærumevure ãrojaru, ye baju ãmevu. Ðaivübu ñuja yópe Jümenijicui urópe, mearore jínavivü úre. Ubenita jáve ãrurivübu ñuja, memecarãjivü mujare. ¹⁴Memecaivübu mujare Cristoi ure ðaiye boje ñujare, üi ue boje caivu póevare.

Maja coreóvaivübu cüinácu ümu, maje jacobu Cristo, yaicáyu bácu caivu póevare boje. Caivu póeva yaijororivureca ne ãmeina teiye boje, Cristorecabe yaicáyu bácu majare boje. Que baru caivu úre ju aivu yópe yaivu bácvupebu maje cuede úque cüinávure. ¹⁵Cristo yaicárejaquemavu caivu póevare boje, maja úre ju aivu, maje dajocarãjiyepere ayu maje ðaiyede, torojure ðarãjivü maje baju quévura, ubenita quénora maje ðarãjiyepere ayu caiyede, maje torojure ðarãjiyepere aivu úre. Úrecabe yaicáyu bácu aru Jümenijicui nacovaimu mácu máre majare boje. ¹⁶Ñuje ju aipe báquemata Cristore, “Que baibi”, arí dápiabevü aipe ãrojacure póecure ñuje jáiye boje úre, yópe ijãravucavu Jesúre ju abevü “Que baibi”, ne arí dápiayepere. Ñuja nápe paivu “Que baibi”, arí dápiavü bácvuvacari Cristore javede, caride nápe paivu “Que baibi”, arí dápiabevü. ¹⁷Que baru maja Cristore ju aivu curivübu úque cüinávure. Jümenijicui oatvaimaratamu

maja. Yópe mamarumure póteivü bácvupebu. Maje dápiayede, maje ðarí cõmajiyede, maje ju arãjiye jípcocai Cristore dajocadavü maja caride. Quénora maje cuvare boje mamaümene, maje dápiayede, maje ðarí cõmajiyede, oatvavadavü maja caride. Majarecabu dajocavü bácvu javede maje ðarí cõmajiyepere báquede maje ju arãjiye jípcocai. Quénora ðarí cõmajiyavü mamaene caride.

¹⁸Jümenijicurecabe ðare ðayu caiye iyede majare boje. Cristoi ðaiye báque boje, Jümenijicu cãrijimene ðarejaquemavu majare úque, maja úre maucuvavivü bácvu, maje yóvarãjiyepere ayu úre. Aru ñujare cãrijimene ðare ðaicójeneyame apevu póevare máre úque, na úre maucuvavivü, ne yóvarãjiyepere ayu úre. ¹⁹Yópe ayubu yu. Cristoi ðaiye báque boje, Jümenijicu cãrijimene ðaiyuríduibi caivu ijãravucavure úque, ina úre maucuvavivü, ne yóvarãjiyepere ayu úre. Coyurí ñájine ðabebi ne vainí tuiye báquede üi ðaicójeiyede jocarí. Aru ñujare coyucójeimi náre üi yávaiye méne üi cãrijimene ðaiyena. ²⁰Cristoi daroimaramu ñuja, coyucarãjivü üi yávaiye méne. Ñuje arí coyuiyede póevare “Maucuvabejará muja Jümenijicure. Quénora úre cãrijimene ðare ðaicójejara mujare úque” arí, yopedecabu Jümenijicuvacari üi que jëniajúroe náre. Ñuja paruróreca jëniacavübu mujare Cristore boje. Yópe arí, “Maucuvabejará muja Jümenijicure. Quénora úre cãrijimene ðare ðaicójejara mujare úque”, Cristo ñujare jëniacójeimi mujare. ²¹Maja curivü Jesucristoque cüinávure Jümenijicui cãrijimene ðaimaramu caride. Cristovacari ye ãmenore ðabedejaquemavu cainumü. Ubenita Jümenijicu járejaquemavu úre yópe üi jáiyepere ãmenore ðayupe majare boje, meadacuyü majare. Que baru Jümenijicu jáñume majare curivure Jesucristoque cüinávure, yópe üi jáiyepere boropatebevure.

6 ¹Aru ñuja memecaivü Jümenijicure mujaque paruróreca

jēniavaivubu mɔjare, mɔje ju are nɔrajipeye aivu Jūmenijicui urarō mearo đacaiyede, ũi meadaquiyepe aivu mɔjare. ²Jūmenijicuvacari, yópe arí, toivaicōjenejaquemavu ũi yávaiyede:

Mɔje órejarājiyede yure, ji cadatequiyepe aivu mɔjare, jápiarí cadatecuyumu mɔjare. Yo jāravu baquinó ji meadaquijāravure, meadacuyumu mɔjare, arejaquemavu Jūmenijicu.

Jápiarā mɔja. Caridecaba Jūmenijicui mɔjare cadatejurorijāravu. Cari jāravurecaba Jūmenijicui mɔjare meadajurorijāravu. Mɔjare cadateni meadaiyubi Jūmenijicu cari jāravu baju. ³Cainumua ñuje memecaiyede Jūmenijicure, ye āmeina teiyubevu ñuja aru apevure máre ye āmeina tede đaiyubevu ñuja, ñame ne āmeina yávarí buojabenajipeye aivu ñujare aru ju abevu āmenajipeye aivu Jūmenijicui yávaiye méne, “Diede coyucaipóeva āmeina teivubu aru āmeina tede đavubu apevure máre” aivu. ⁴Quénora caiye ñuje đaiyeque jáđovaiyurivubu đavũ me, yópe memecaipevare jauépe Jūmenijicure.

Que baru napiyurivubu cainumua ñuje ñájiyede, ñujare jauéde, aru ñuje cārijiyede máre. ⁵Póeva ñujare jara popeivu bācavuvacari, ñujare jēni jacoivu bācavuvacari āmeina teivure jēni jacoĩnami jívu, aru ñujare maucvarí, cārijovari boaiyurivubu bācavuvacari máre, caiye ñuje đaiyeque jáđovaiyurivubu đavũ me, yópe memecaipevare jauépe Jūmenijicure. Ñuja urarō memevu bācavuvacari pu uetuiyeta, aru ñuja cāmevu bācavuvacari ñuje memeiye boje, aru ñuja āiyede āmevu bācavuvacari máre ñuje memeiye boje, cainumua jáđovaiyurivubu đavũ me, yópe memecaipevare jauépe Jūmenijicure. ⁶Que baru āmeina tebevũva đare nuiyurivubu me Jūmenijicui jáĩnore. Jūmenijicui yávaiyede jávene majide nuiyurivubu. Aru napine nuiyurivubu póeva ne đaiyede. Cadatede nuiyurivubu

póevare. Cũre nũvaiyurivubu ñai Espiritu Santore aru ure nuiyurivubu póevare cainumua. ⁷Jūmenijicui yávaiyede jávene coyũre nuiyurivubu. Aru Jūmenijicui parúeque ñuje cũvaede memecare nuiyurivubu. Cainumua mearore đaiyurivubu, meatenajivu maucvaburí āmenore, yópe churarava ne meateipeye, ne maucvarājiyepere aivu ne mavare.

Que teni majidivubu ñuja aipe đaiye jauróre, vainí turí jaruvarājivu āmenore aru vainí tubenajivu ñuja máre. ⁸Apenumua apevu póeva pueđadama ñujare. Aru apenumua pueđabena ñujare. Apenumua apevu póeva āmeina yávadama ñujare. Aru apenumua me yávadama ñujare. Apenumua “Borocurivubu”, ũbenina arí dápiađama ñujare, ñuja borocubevũva yávaiyede jávene coyũvaivureca. ũbenita ye baju āmevu ñujare. ⁹Ñuja obedivu ne me coreóvaimarareca, apenumua “Caivu ne coreóvabemaratumu”, ũbenina arí dápiađama ñujare. Apevu “Náre ne boaicōjeimara márājima”, ũbenina arí dápiaivureca ñujare, ñuja arurivubu. Ñujare urarō ñájine đavuvacari, ñujare boarí jaruvabema. ¹⁰Apenumua chíovuvacari ñujare āmeno vaiye boje, torojurivubu ñuje ũmei cainumua. Ijāravuque cũve cũvabevuvacari, apevure cũve cũvarivure tede đavubu ne ũmei urarō Jūmenijicui mearo đacaiyede ñuje cũvare đaiyede náre Jūmenijicui yávaiye méne. Aru ñuja ijāravuque cũvabevuvacari, caiye iye méne Jūmenijicui cũvare đaiyede ũ jinare cũvarivubu ñuja.

¹¹Mɔja, jívu, Corintocavu, jidubevũva coyivubu mɔjare nuríe, ñuje dápiaiyede ye yavebevũva. Jáđovavubu pare ñuje ũede mɔjare. ¹²Joi āmevu ñuje ũme mɔjare jocarí. Ñujacapuravu yóvaiyubevu āmevu mɔjare. Quénora joi ũme cũvu ñujare jocarí. Mɔjacapuravurecaba yóvaiyubevu ñujare. ¹³Que baru yu jēniaivu mɔjare paruróreca, yópe népacui jēniaipeye ũi márare. Yópe ji pare ũepe mɔjare, quédecu țjarā yure.

**Pablo ñi majicaino Jesúre ju
aipõevare, ne yóvabenajiyere ayu
Jesúre ju abevuque**

(1 Co 3.16, 6.19)

¹⁴ Ñbenita ji ñedeca muje yóvarãjiyere ayu yure, yóvabejarã muja ina Jesúre ju abevuque, uparivu teiyede náque aru ñajivu tãtuturare aru purubuoiyede náque máre. Põeva mearore ðaivu ye buojabenama yóvaivu ina ñmenore ðaivuque. Aru pøeva mãdãroi cuivure, ne mearore ðare nuiye boje, ye buojabenama yóvaivu náque, ina ñeminoi cuivure, ne ñmenore ðare nuiye boje. ¹⁵ Cristo ye buojabebi yóvayu ñai abujuvai jabocuque. Aru Jesúre ju aipõecu ye buojabebi yóvayu Jesúre ju abevuque, ne dãpiarĩ cõmajibe boje cünáturu. Nácapuravu pøpeimarare mearore jívaivubu. Ñbenita majacapuravu Jümenijicure mearore jívaivubu. ¹⁶ Aru pøpeimara ye buojabenama yóvaivu ñai Jümenijicu arucu ñi mearore jíñami jívu. Maja Jesúre ju aipõevavacari ñai Jümenijicu arucu mearore jíñamipebu. Yópe arĩ, toivaicõjenejaquemavu Jümenijicu ñi yáva iyede:

Ji pøevaque sucuyutu yu. Yópe ji cuiyere ne jëneboi yóvasuyutu yu náque. Ne mearore jímu macuyutu yu. Aru nácapuravu ji pøeva marajárama, arejaquemavu Jümenijicu.

¹⁷ Que baru Jümenijicu yópe máre arĩ toivaicõjenejaquemavu ñi yáva iyede, ñi pøeva ne majinajiyere ayu aipe ðaiye jauõre pøpeimarare mearore jívure:

Náre dajocarĩ, etajarã muja náre jocarĩ. Que teni náque yóvabeni, coatejarã muja náre jaruvarĩ. Ye tuobejarã muja caiye ne cvaede, ne ñmeina ðaiyeque cvaede. Que ðaru, mujare me coru etacuyutu yu. ¹⁸ Yu bacuyutu mujerasu. Aru muja jímara marajáramu, arejaquemavu maje jabocu Jümenijicu, ñai parucu caivu pueno.

7 ¹ Jáve Jümenijicu ðacacuyume majare caiye iye mearo ðacaiyede yópe ñi aiyé báquepedeca. Que baru muja, jívu, ji umara, yópe pøevai jaruvaiyere docucuede ne joaiyede, nopedeca jaruvaiye javvu majare maje ñmeina teiyede. Iye maje bajure ñmedaiyede aru maje ümene máre ñmedaiyede coatenajarevu diede jaruvarĩ. Jümenijicure memecaiye matuiyeda javvu majare, maje pueðaiye boje ñre.

**Corintocavu Jesúre ju aipõeva ne
jaruvaino ne ñmeina teiyede**
(2 Co 2.13)

² Ujarã ñujare. Jãpiarĩ adabejarã ina ñmeina yávaivure ñujare. Ñamene ñmeina ðabetecarã ñuja. Ñamene ñmeina tede ðabetecarã ñuja. Aru ñamene jujovabetecarã ñuja. ³ Caiye iye ji toivaicõjeiyede apecure mujare toivaicõjemenvu ñmecorocuyu mujare. Yópe ji toivaicõjeiye báquepedeca apecure mujare jipojĩcai, pare urivubu mujare. Ñuje urarõ ue boje mujare, yóvayurivubu mujare maje cuede ijãravui. Aru apenvu ne mujare boarĩ jaruvaiyuru, mujaque yayurivubu ñuja. ⁴ Jidubecava coyuvu mujare nurie ji dãpiariyede ye yavebecava. Muja torojure ðadavü yure. Que baru apenvu pøevare coyuvubu muje borore. Caiye maje ñãjiyedeca, muja cadatedavü ñujare, muje parure ðaiye boje ñuje ümei, aru muje torojure ðaiye boje máre ñuje ümei.

⁵ Ñuje eaiyede yui Macedonia ñmicurijoborõ, pu caride máre ye jabuóvabenvu ñuja cãrijivu. Cainumua ñãjivaivubu ñuja, apenvu ne maucvave boje ñujare aru ñuje cãrijiye boje pøeva ne ðãjuroede aru muja máre, muje ðãjuroede. “Dajocarãjichuma ne ju aiye de Jesús ñi yáva iye mène”, arĩ dãpiarĩ mujare, cãrijivubu ñuja. ⁶ Ñbenita Jümenijicurecabe, ñai cadateyu ina cõmaje ñrojarivure, cadateyu bácu ñujare. Parure ðáme ñujare ñuje ümei, Tito edaiyede yore. ⁷ Parure ðaibi ñujare ñuje ümei, ñi

edaiye báque boje, cꝛꝛꝛꝛꝛ ññjaque. Æbenita pꝛeno baju parure ðaibi ññjare ññje ùmei, ùi coyuiyede muje parure ðaiyede ùre ùi ùmei. Pare ññjare jáiyurivubuya. Chõivubuya muje àmeina teiyede. Cãrijivubuya ji ñájiyede mujare boje. Que baru pꝛeno baju torojuvu yu ji ùmei.

⁸Mamarumure ji jaroiyede mujare no paperayoca ji toivaicõjeino mácarõre apecure, jaracꝛꝛꝛ mujare muje àmeina teiye boje, pare cãrijijnũ matecãcu yu. “¿Chõiore ðaquijichuri yu náre?” arí dápíari ðaquijichuri batecãcu. Aru muje jári boroteiyede no paperayoca bácarõre, chõiquemavu muja. Yu mujare chõiore ðayu bácvacari, “Nore apecure toivaicõjeiye jaubeteavũ yure”, arí dápíabevũ yu. Chõiovũ batequémavu muja obebejaravure. ⁹Caride torojuvu yu, ji toivaicõjeiye báque boje apecure no paperayoca bácarõre. Ji chõiore ðaiye báquede mujare torojubevũ yu. Æbenita me torojuvu yu, muje chõiori oatuvaiye boje muje ðaiyede. Muja jáquemavu muje àmeina teiyede yõpe Jũmenijicui jáiyepe diede, muje oatuvaiye báque boje muje ðaiyede. Que baru mujare àmedabetecacu yu, ji toivaicõjeiye báque boje apecure, majiacacꝛꝛꝛ mujare. Quénora mujare cadatecacu yu.

¹⁰Ñai jáñũ ùi àmeina teiyede yõpe Jũmenijicui jáiyepe diede chõiori oatuvayube ùi ðaiyede. Que baru Jũmenijicu meadayube ùre, ùi àmeina teiyede jaruvãri. Aru chõiomecube cainumua. Æbenita ñai jáñũ ùi àmeina teiyede yõpe põeva Jũmenijicure coreóvabevũ ne jáiyepe diede chõioñme, ùi cꝛꝛꝛꝛ teiye boje põeva ne jáiyede, ùbenita oatuvaiyubecube ùi ðaiyede. Que baru ñaine Jũmenijicu coavayube ùre jaruvãri cainumua. ¹¹Dápíajará muja caiye iye mearo vaiyede mujare, muje chõiori jáiye báque boje muje àmeina teiyede yõpe Jũmenijicui jáiyepe diede. Maumena corebevũva iye àmeina teiyede dajocaquemavu. Coyucaquemavu ji borore, cadatenajivu yure ji maucu ùi àmecoroiyede yure.

Jaraqemavu muje bajumia muje àmeina teiye báque boje. “¿Nõpe àmeina tenajichuri maja cojedeca?” arí dápíari jidutequemavu muje ñájijuroede die boje. Jáiyuriduquemavu yure cojedeca. Cãrijivu yure boje ji ñájiyede mujare boje, yure ju aiyutequemavu. Aru ñai ji maucure ñájiye ðaquemavu. Caiye iye muje ðaiye báqueque jáðovaquemavu muje baju boropatebevũpe caride.

¹²Jáðovaiyubetecacu ñai àmedayũ boropateyure, ùi àmeina teiye boje aru yu, ùi àmedaimu mácu, boropatebecure quédada, no paperayoca ji toivaicõjeino mácarõre apecure mujare. Quénora jáðovaiyutecacu mujare Jũmenijicui jáinore muje chõoiyede, ññje ñájiye boje, muje pare urí cadateiyue boje ññjare.

¹³Que baru ññjare me cadatedavũ muja, parure ðari ññje ùmei, muje me jápiari ju aiye boje yure.

Torojuvu ññja, muje nõpe cadateiye boje ññjare. Æbenita pꝛeno baju torojuvu ññja, ññje jáiyede majecu Tito ùi torojue boje, caivu muja muje cadateiye báque boje ùre, ùi parure ðaquiyepere ayu ùi ùmei, ùi cue báquede muje yebai. ¹⁴Titõi etaquiye jipocai, jácꝛꝛꝛꝛꝛ muje yebai, muje torojure ðaiye boje yure, “Ññjare me jápiari ju arãjarama majevũ Corintocavu”, arí coyucacu ùre muje borore. Aru muje me jápiari ju aiye boje, cꝛꝛꝛꝛ yu, ji nõpe coyuiye báque boje ùre. Yõpe caiye ññje coyuiyepere mujare jávepe, quédaca ji coyuiye báque boje borore Titore máre jávetamu. ¹⁵Caride pꝛeno baju ubi mujare, ùi àruéne muje me jápiari ju aiye ùre, aru muje me jacopuiye báquede ùre máre, ùre pueðari yõpe muje pueðajuroepe jabocu jidojacure. ¹⁶Pare torojuvu yu. Jidubecava aru chõiomecava máre majivu yu mujacapuravu ðaivure caiyede yõpe mujare jauéde, ye jaubeda.

**Jesúre ju aipõeva ne jño jecñbevũva
cũve cãvabevũre
(Ro 12.17, 15.26)**

8 ¹Muja, jivu, caride mujare coreóvare ðaiyurivubu ññja

ina Macedonia āmicurijoborōcavu Jesúre ju aipōeva ne mearo đaiyede Jūmenijicui mearo đacaiye boje náre bojecubeda ũi me boje. ²Návacari pare nájivaivubu. Ūbenita nájivuvacari, jádovadama Jesúre ju aivure jáve. Nájivuvacari, cainmna me torojma ne ũmei. Aru návacari ure cve cūvabevutamu. Ūbenita cve cūvabevuvacari, jecubevuva jívaivubu ina Judea āmicurijoborōcavu Jesúre ju aipōeva cve cūvabevure yōpe cve cūvarivū ne jjúroep. ³Jāve coyūivū yu mujare. Caino ne oainope jíma na. Aru pueno baju yōpe ne jíye buojabejúroep jíma na. Jíbeteima ne cūvaequede náre jaubede quénora. Ūbenita náre jauéquede máre jíma na. Aru pōescu cubeteame jícōjeñū mácu náre. Quénora návacari “Jínajarevu, cadatenajivū ina cve cūvabevure”, aquemavu.

⁴Parurōreca nūjare jēniaivū bateima, nūje ĩni nūvarajiyep aivū ne tātuturare ina Judeacavu Jūmenijicui pōeva cve cūvabevure. ⁵Nūje coreiye báque pueno baju, jíma na. Mamarumure “Yōpe mi urōpe đarājaramu nūja”, aquemavu maje jabocu Cristore. Aru no yóboi, “Yōpe nūje urōpe đarājaramu nūja”, aima nūjare, Jūmenijicui nópe aicōjeiye báque boje náre. ⁶Nūje jáiye boje ina Macedoniacavu Jesúre ju aipōeva ne pare cadateiyūede ina cve cūvabevure, Titore jēniacarā nūja paredeca, ũi copainūquiyep aivū nūje yebai. Javede Tito cójjjovarī búquemavu nūje jíyede. Que baru jēniacarā ũi cadatequiyep aivū mujare, nūje cójjjovarī buojarājiyep aivū tātuturare, nūje jínajiyede ina cve cūvabevure.

⁷Muja ju aivubu Jesúre arevū pueno. Muja coyūivubu Jesús ũi yávaiye méne arevū pueno. Muja coreóvaivubu iye yávaiyede jávene arevū pueno. Maumena corebevūva muja memecaiyūrivubu arevūre arevū pueno. Muja ũrivubu pōevare yōpe nūje ũepe arevū pueno máre. Que baru quédeca pueno baju jjarā nūje cūvaequede máre, cadatenajivū cve cūvabevure.

⁸Ji coyūiyede mujare diede, jícōjemevū mujare. Quénora coreóvare đayūbu mujare arevū Jesúre ju aipōeva ne ũrarō jíyena, ne pare ũe cadateiyūe boje cve cūvabevure, nūje jádovarajiyep aivū muja máre jáve ũrī cadateiyūrivure náre nūje jíyepue jecubevuva. ⁹Muja me coreóvaivubu iyede. Maje jabocu Jesucristo, ũi pare ũe boje majare, pueno baju mearo đacarejaquemavu majare bojecubeda. Nai cve cūvacavacari caivū pueno, ũi cūvae boje caiye majepacu Jūmenijicui paruéde, pōescupe teni cve cūvabescupe caivū pueno tedejaquemavu ũ. Aru ũi nópe teiye báque boje, cve cūvarivūrebu maja, maje cūvae boje caiye iye Jūmenijicui méne. Que baru ũi nópe cadateiye báque boje majare, arevūre cadateiye jauvu majare máre.

¹⁰Yū jícōjeiyūbecūvacari, majicaiyūvu mujare. Ji dāpiaru, meavu mujare nūje buojaru iye tātura cójjjovaiye nūje buiye báquede apejū barede. Mujarecavu jīni buivū bācavu caivū arevū jívu ne jínajiyep jipocai. Aru pueno baju mujarecavu “Jínajarevu” aivū bācavu máre caivū arevū “Jínajarevu”, ne arājiyep jipocai. ¹¹Que baru maumena corebevūva buojajarā iye nūje buiye báquede. Muja pare buiyūrivū bācavu iye tātura cójjjovaiyede, cójjjovarī buojajarā máre maumena corebevūva. Jjarā yōpe nūje oainope, nūje cūvaeacarōque. ¹²Maje jáve jíyuru, cadatenajivū arevūre, Jūmenijicu torojcu me jāñūme maje jíyede. Jūmenijicu ũbi maje jíyede yōpe maje oainope, maje cūvaeacarōque. Jēniamecube majare maje jíyede maje cūvabede. ¹³Yū ũbevū nūje jínajiyep aivū arevūre jauéde, pu nūje cūvabeta mujare jauéde. ¹⁴Quénora ũvu yu caivū ne cūvarājiyep aivū cūinātūru. Que baru caride mujacarpūravū, cūvarivū caiye mujare jauéde aru mujare jaué pueno máre, jjarā, cadatenajivū ina cūvabevure. Aru arevūmure nācapūravū, cūvarājiyep caiye náre jauéde aru náre jaué

püeno máre, jínajarama, cadatenajivu mña cuvabenajivüre. Que teni caivu cüináturu cüvaräjivübu. ¹⁵Quédeca yópe arí, toivaicōjeneaquemavu Jūmenijicu ũi yávaiyede: “Ñai űrarō ññu mácu puruiyede cuvabedejaquemavu. Aru ñai quijino ññu mácre jaubedejaquemavu”, arí toivaicōjeneaquemavu.

Nópe ayu, Jūmenijicu jíyüre ũi pōevare náre jauéde cainumua aiyuerejaquemavu.

**Tito aru pucarā ũi yóvaimara
ne nurajino Corinto**

¹⁶Jūmenijicu Titore cadateiyüre ðaibi mujare yópe ũi cadateiyüre ðaiyepe yüre. Que baru torojuede jívu Jūmenijicure. ¹⁷Tito pare cadateiyubi mujare. Apecu copaicōjemecuva űre mñje yebai, űvacari “Corinto copaiyvü yu”, áme. Que baru ji jēniaye báquede űre paredeca, ũi copainuquiyere ayu mñje yebai, maumena corebecuva ju áme yüre.

¹⁸Que baru jácunucuyume mujare bediōva. Aru űque jarocuyumu yu apecu majecüre, majape ju ayüre Jesúre. Caivu Jesúre ju aipōeva me pueðadama űre, ũi coyuiye boje Jesús ũi yávaiye méne, ũi meaðaiyede pōevare. ¹⁹Obedivu ne pueðaimvacari ũi coyuiye boje Jesús ũi yávaiye méne, püeno baju ne pueðaimume Macedonia āmicurijoborōcavu Jesúre ju aipōeva cójjivaivu, ne beoie báque boje űre, ũi yóvaquiyere aivu ññjare, ññje nuvarajiyede iye tauturare Judea āmicurijoborōi. Cadatecyume ññjare, ññje jári corenajiyepe ayu me iye mñje jíyede. Me jári coreiyurivübu ññja diede, pōeva ne mearore jínajiyere ayu maje jabocu Jesucristo ne pueðaimure aru jáðovarajivu maja Jesúre ju aipōeva maumena corebevüva cadateiyurivüre majevü cüve cuvabevüre. ²⁰űre yóvaicōjeivübu ññjare, ñame ne āmeina yávarājiyere aivu ññjare, ññje nuvaiye boje iye űre tauturare, mñje jíyede. Ñamene ye āmeno jáicōjeiyübevü ññjare yópe ne jáiyere āmeina teivüre.

“Ññje tauturare ñavaivübebu”, ubenina arí coyubejarári pōeva. ²¹Que teni urivübu ññja pōeva ne járajiyere aivu mearo ññje ðaiyede cainumua, yópe Jūmenijicui jáiyepedeca mearo ññje ðaiyede. Jūmenijicu coreóvayube ññja jínajivüre caiye iye tauturare ina cüve cuvabevüre. űbenita urivübu ññja pōeva máre coreóvaivüre diede.

²²Aru náque jarocuyumu yu apecu majecüre, majape ju ayüre Jesúre. Ññja buojaivübu majidivu űre pare cadateiyücure apevüre, ññje jáiyे boje aipe ðari cómajiyüre. űi jápaiye boje mñje borore, jáve napini coreyube mña jínajivüre jecubevüva, cadatenajivüre me ina cüve cuvabevüre. Que baru püeno baju jácunuiyucube mujare.

²³Pōecu ũi jēniari járu ñamejare aru ye paruéde cüvarivüre, yópe arí, coyujarā mña: “Titobe Pablöre yóvayu, Jesúre memecayu aru majare Jesúre ju aipōevare cadateyu”, arí coyujarā Tito ũi borore. Aru apevu ina pucarā űmüva ne borore, yópe arí, coyujarā: “Macedoniacavu Jesúre ju aipōeva cójjivaivu ne jaroimaramu, nuvarajivu ne jíye báquede Judeacavu Jesúre ju aipōeva cüve cuvabevüre, pōeva ne mearore jínajiyere aivu maje jabocu Jesucristo ne pueðaimure”, arí coyujarā mña. ²⁴Näre me copu etarí, pueðarí, cadateni, jáðovajara náre aru náre daroivu bācavüre máre jávene ji coyuiye báquede náre mñje borore. Ññjare torojure ðaivübu mña.

**Jesúre ju aipōeva ne jino,
cadatenajivu apevüre**

9 ¹⁻²Apecüre mujare toivaicōjene nuiye jaubevü yüre, iye mñje jínajiyere ayu jecubevüva, mñje cójjovaiye boje tauturare apecju bācarōre pu caride máre. Yu majivu mña cadateiyurivüre. Que baru mña Acaya āmicurijoborōcavu Jesúre ju aipōeva mñje borore, yópe arí, coyuvaivu yu ina Macedonia āmicurijoborōcavu Jesúre ju aipōevare: “Majevü Acayacavu cójjivaivübuya

iyе ne jínajiyede ina cуve cуvabevure areyju bácaröre pа caride máre”, arí соуvаivу yу. Aru mуje maumena corebevуva jýуe boje, obedivу ina Macedoniacavу máre maumena corebevуva jýуrivubu. ³⁻⁴Ina yóbecurá majevу Jesúre ju aipóevare jarосууmтu yу mуje yebai, ne cadatenajiyere ayу mуjare, mуje cójijovarí buojarájiyere ayу mуje táuturare. Que teni mуja jáđovarajaramu jávene iye ji соуиye báquede mуje borore apevu majevу, Macedoniacavу, ne eaiyede yáque. “Majevу Acayacavу cójijovaiвbuya ne jínajiyede javede”, arí соуre nuivу yу. Ñuje earájiyede mуje yebai, mуje cójijovabedu cáreja mуje jínajiyede, pare cуyejebu yу, ji соуrídуйe báque boje ubenina mуje borore. Aru mуja máre cуyejebu pare. ⁵Que baru jéniaivу ina yóbecurá majevure, ne nurajiyere ayу mуje yebai ji nuquie jipocai. Cadatenajarama mуjare, mуje cójijovarí buojarájiyere ayу mуje jínajiyede, yópe “Jínajaramu”, mуje aiye báquepedeca jipocamia. Que teni jáđovarajaramu mуja ji jícójememarare, quénora jýуrivure jecubevуva.

⁶Árurajara mуja iyede. Mуje majióvaró mearore daru apevure, Jümenijicucapüravу mearo đacacуume mуjare majióvaró baju. Ubenita mуje uraró mearore đaru apevure, Jümenijicucapüravу mearo đacacуume mуjare uraró baju. Jévari соуиyeque oteipóescu üi đaiyede соуquijivу yу. Oteipóescu obebeyabea oteiyabeare oteyу baru, ícуume majióvaróra jéijaravу baquinói. Ubenita obediabea oteiyabeare oteyу baru, ícуume uraróra jéijaravу baquinói. ⁷Caivу mуja coapa jíjará mуje cуvaecaröre yópe “Quéno baju jíсууmтu yу”, mуje arí dápaiyepedeca mуja coapa mуje ümei. Chíori jecurivу jýуbevure yéde jíbejará mуja. Apecui jícójeimarape máre yéde jíbejará. Quénora torojurí jecubevуva jíjará mуja, Jümenijicui ne boje ñai torojurí jecubecvа jýуre. ⁸Jümenijicu jýу majibi üi mearo

đacaiyequede, ijárvуquede, mуjare uraró baju, ye jaubequiyere ayу mуjare. Aru caiye mуjare jauéde jíniburu yóboi, uraró pурquiyebu mуjare. Que baru cуvarájaramu mуja mearo đacaiyequede, ijárvуquede, cadatenajivу apevure. ⁹Yópe arí, toivaicójenejaquemavу Jümenijicu üi yávaiyede ñai póescu meacu üi borore:

Üi cуvaecaröre jívayube jecubecvа ina cуve cуvabevure. Aru üi mearo đacaiyede árurajarama cainмua, arí toivaicójenejaquemavу.

¹⁰Bedióva cojedeca jévari соуиyeque соуquijivу yу. Yópe oteiyе pírari buojari aru bucari buojari, oteipóescu íyere üi áquiyeva aru üi otequiyeva máre, nopedeca mуja mearore đavу baru mуje cуvaeque, cуvarájaramu mуjare jauéde aru mуje jínajiyede máre pueno baju, mearore đarájivу aru cadatenajivу apevu póevare. Jümenijicurecabe jýу oteiyabeare ñai oteipóescu aru áiyede póeva ne árajiyeva. Urecabe mearore đare đayу mуjare máre. ¹¹Que baru üi mearo đacaiyequede, ijárvуquede, uraró cуvarájaramu mуja cainмua, jínajivу apevure jecubevуva. Aru obedivу póeva, ina majevу Judeacavу Jesúre ju aipóeva cуve cуvabevу, torojuede jínajarama Jümenijicure, iye jýу boje mуje jarorájiyede náre ñujaque. ¹²Mуje jýyede apevure, mearore đavubu, mуje cуvare đaiye boje náre jauéde. Ubenita pueno baju mearore đavubu, obedivу póevare mуje jíde đaiye boje uraró torojuede Jümenijicure. ¹³Mуje memecaiyede náre iye jýyede mуje jarorájiyeque, jáđovarajivubu mуja ju aivure jáve đajocabevуva Cristoi yávaiye méne, aru mуja jívure jecubevуva, cadatenajivure náre aru apevure máre. Que baru mearore jínajarama ne puedaimure Jümenijicure. ¹⁴Mуjare pare urivу jéniajararama Jümenijicucque mуjare boje, üi pare mearo đacaiye boje mуjare bojecubeda üi me boje. ¹⁵Torojuede jínajarevу Jümenijicure, üi jýуe báque boje majare pueno baju

méne. Põeva ne yávaicamuaque ye buojabenama coyúvu diede.

**Pablo úi majicaino Jesús úi yávaie
méne beorí coyúicójeimara ne
daiyena
(1 Co 1.31)**

10 ¹Caride yávacari, Jesús úi yávaie méne beorí coyúicójeimaracacu, coyúvubu mujare, amecoroivure yure. Yópe Cristoi coyuiyere pðevare, náre cadateni aru pueðarí meacu pðescupe, nopedeca coyúyvuvu mujare. Que baru mujare pueðarí meacu pðescupe aru mujare cadateiyurí, paredeca jéniaivu mujare, muje dajocarájiyere ayu muje amecoroiyede yure. “Pablo jiducu jararí buojabebi úi cuede majaque. Ubenita úi cuede joai majare jocarí, jidubecva jararí buojaibi úi toivaicójeiyede apesure paperayocare majare”, ubenina aríduivubuya muja. ²Yurecabu jararí buojayu mujare ji cuede mujaque máre. Que baru jéniaivu mujare. Jarare ðabejará yure ji eaquiyede muje yebai. Mujacavu yópe arí, “Pablojá dápiarí cômajivubu yópe ijárvucavu Jesúre ju abevu, Espírítu Santore cuvabevu, ne dápiarí cômajiyere. Que baru nápe ðarí cômajivubu Pablojá”, ubenina aríduivubuya. Ina nópe aríduivure jaracuyumu yu jáve.

³Jáve ñjatatamu ijárvuvi curivu. Ubenita ijárvuvi curivuvacari, maucuvabevu ñuje mavare yópe ijárvucavu Jesúre ju abevu, ne maucvarepe. ⁴Yópe churarava ne maucvarepe ne mavare boaicaroveaque, nopedeca ñuja maucvarivubu ñuje arí dápiarí coyuiyeque. Ubenita arí dápiarí coyurí majibevu ñuja pðeva ne arí dápiarí coyuiyeque. Quénora Jümenijicu ñujare majide ðaibi úi paruéque, ñuje coyurájiyere ayu ina úre maucvarivure úi yávaiyede jávene, ne majinajiyere ayu ubenina ne arí dápiayede. Nüja, Jümenijicui parure ðaimara úi majiéque, jáðoavivubu borocuede ñuje mauva ne

amecoroiyede ñujare. ⁵Cainüma ina mujacavu “¿Meara márica apenv püeno?” aríduivu, “Jáve ámevu”, ubenina ne aríduiyede Jümenijicui yávaie ména, pðeva ne coreóvabenajiyere aivu Jümenijicui majiéde, ñuja coyuvavubu Jümenijicui paruéque, jáðovarajivu ubenina ne arí dápiayede. Que teni yópe churarava ne vainí turí jéni jacoiyere ne mavare, ju are ðarájiyere aivu náre ne baju jabocure, úi còjequiyere aivu náre, nopedeca maje jabocu Cristore dápiacójene ðavubu ñuja ñuje mavare, ne ju arájiyere aivu úre ñuje coyuvaiyede Jümenijicui paruéque. ⁶Muje jáðovarajiyede me ju aiyurivure Jümenijicure jaubevva, ñájine ðarájaramu ñuja mujacavu caivure muje ju abedu.

⁷Muja jáivubu aipe árojarivure ñuje bajure. Ubenita majibevu aipe árojarivure ñujare ñuje úmei. Cüinácu mujacacu “Jáve yábu Cristo jicu” ayu, coreóvajacurí ñujare máre Cristo jinare. ⁸Ji coyuiyede ñuja Jesús úi yávaie méne beorí coyúicójeimarava ñuje parué cvaede, yópe “¿Meara márica?” aivure coyuvvacari, yópe yure coyuiye jaubepe, ye cvebecubu yu. Maje jabocu Cristo ñujare coyúicójememi mujare úi yávaie méne, ñuje dajocare ðarájiyere ayu mujare muje ju aiyede úre. Quénora ñujare coyúicójeimi mujare diede, ñuje parure ðarájiyere ayu mujare muje ju aiyede úre. Que baru cvebecubu yu ji coyuiyede. ⁹Mujare cuavaiyubevu yu yo paperayocare ji toivaicójeiyede apesure mujare parurõreca. ¹⁰Cüinácu muje jéneboi cucu, “Pablo paruéque majicayube majare yópe majicupe úi paperayocare, úi toivaicójeiyede apesure. Ubenita úi cuede majaque parubecu majicarí buojabecube majare. Quénora coyuvube yópe majibecupe”, ubenina aríduibuya. ¹¹Ubenita ñai que aríduyu coreóvajacurí iyede. Yácapüravu cüináturneca coyucuyumu mujare ji cuquiyede mujaque, yópe ji toivaicójeiyere apesure paperayocaque ji cuede joai mujare jocarí.

¹²Jāve ņija cūináturpe teiyubevu ina mje jēneboi cūrivu “¿Meara mática maja arevu pueno?” arī dāpiaivupe. Aru nápe raivu máre jēvari soyuiyubevu ņija. Nácarūravu majibevutam. Corevaicōjeivubuya ne đaiyede yópe ne urōpe. Aru jēvari soyuivubu ne baju. ¹³Ūbenita ņjacapūravu “¿Meara mática?” aivu baru, soyjebu ņje đaiyede Jūmenijicui parúeque no joborōre quéno, árore ņjare memecaicōjeame úre. ņjare úre memecaicōjeino mácarōre jocarī, ye arī soyubejebu, yópe arevu ne soyuiyere. Aru no joborō jívui cūrivubu mja, ņjare memecaicōjeino úre. ¹⁴Jūmenijicu ņjare soyuicōjeame mujare Cristo yávaiye méne mamarumre caivu ne jípcai. Que baru đabetcarā ņja yópe ūi memecaicōjemenope ņje copaiyede mje yebai. ¹⁵ņja “¿Me đaivu bática maja?” arī soyubevu arevu ne đaiyena, yópe ņje đájuroepe o ne Jūmenijicure memecaicōjeijoborō ņje memecaicōjejurorōpe úre, yópe arevu ne đaiyere. Quénora ņja napini coreivubu mujare pueno baju ju arājivure Jesúre, memecarājivu Jūmenijicure pueno baju mje yebai, yópe úre memecaicōjeino mácarōpe ņjare. ¹⁶Nópe đarīburu yóboi, ņja napini coreivubu, soyurī bujarājivu Jesús ūi yávaiye méne ūi meadaiyena pōevare apenoa ímaroai Corinto aperūravui, ároa pōeva ne jápiabenoai cāreja diede. No joborótamu máre Jūmenijicure memecaicōjeijoborō mácarō ņjare. Que teni, “¿Me đaivu bática maja?” arī soyubenamu apesu ūi đaiyena yópe ņje đájuroepe, yópe arevu ne arī soyuiyere.

¹⁷Que baru yópe arī, toivaicōjenejaquemavu Jūmenijicu ūi yávaiyede: “Ácu pōesu ‘¿Jūmenijicure memecayū meacu bática?’ arī soyuiyucu baru ūi baju, nópe arī soyubejacurī. Quénora ‘Meacu bajube maje jabocu cavarō mearocasū’, arī soyujacurī ū’, arī toivaicōjenejaquemavu

Jūmenijicu. ¹⁸ņai “¿Jūmenijicure memecayū meacu bática?” ayure ūi baju, Jūmenijicucapūravu “Yure memecayū meacubu”, arī soyubecebe. Ūbenita ņai “Jūmenijicu yure cadateibi ji memecaiyede úre” ayure, Jūmenijicucapūravu, “Yure memecayū meacubu”, arī soyucuyume.

**Pablo ūi soyuino ina borocūrivu
Jesús ūi yávaiye méne beorī
soyuicōjeimarape teivure
(Fil 4.15-18)**

11 ¹Jápiarā ji soyquiyede mujare caride. Ūvu mje napinajiyere ayū yure ji soyquiyede. Yū majicūvacari ņai “¿Meacu bática?” ayū ūi bajuma árumecu bajure, nópe arī janquiyebu yure, mje dajocabenajiyere ayū ji soyuiye báquede mujare Jesús ūi yávaiye méne mje pueno baju jápaiyue boje ape yávaiyede. Que baru napijara yure ji soyquiyede. ²Jūmenijicu yure tebutede đaiibi mujare, yópe ūmū ūi tebuteyere mamaco bojnyore, “Mū cūvacuyūmu óre mimarepacova” ūi arīburu yóboi cūinācu ūmure. Jípacu me jári coreibi mamacore, ūi cūbecojiyere ayū apesu ūmūque, jícyū óre meaco bajure ámeno cūbecova Jūmenijicui jáinore jímarepacu bacuyúre ne pūcūbuojjáravu baquinói. Aru ūi járu apesu ūmure, jípacu jarajebu óre. Nopedeca mujare coreóvare đacacu yū Cristore, mje curājiyere ayū úque cūinávure. Que baru mujare jíyūvu yū úre ámeno cūbevūva Jūmenijicui jáinore. ³Jidvū yū vaiquíyede mujare yópe vaiye báquepe Eva bácore. Yópe ņai áđa majicu ūi jujovaiye báquepe ō mácore, ūi dāpiabecojiyere ayū nurié, ūi ámeina tecojiyere ayū, nopedeca arevu jujovaiyūrivubu mujare, mje dāpiabenajiyere ayū nurié, mje ámeina tenajiyere ayū, dajocarū mje ju aiyede Cristore aru mje memecaiyede úre máre. Que baru jidvū yū.

⁴Mja torojarivu napivubuya arevu soyuipōeva eavure mje ímaroi. Me jápaiyūrivubuya ne soyuiyede Jesúrā,

coyúivureca apede úra ji coyúie báquede jarúvarí. Jacorúivurívubuya apesu decocure ne daroiyúmure, daroiyúvureca apesure, ñai Espíritu Santo ji darore ðaimu mácure jarúvarí. Ju aiyurívubuya ne bueiye de Jesús úi yávaiye méne, ne que aiyede úbenina, bueivureca apede ji bueiye báquede jarúvarí. ⁵Nácapúravu yópe Jesús úi yávaiye méne beorí coyúicójeimarape teniduvubu. Aru úbenina arí dápiavubu mearare ji rueno. Úbenita yácapúravu coreóvaivu iyede. Ne cáchinocacu ámevu yu. Aru ji rueno meara ámema na. Úbenita nárecabu mujare jaboteivu. ⁶Yu yávayu majibecúvacari meacama yávaicamaque, jáve me majivu yu Jesús úi yávaiye méne. Mujavacari me diede coreóvaivubu, muje jápaiye báque boje ji coyúie báquede aru muje jáiye báque boje ji ðaiye báquede obedinuma. ⁷Apevu póeva “Pablo ámeina teyube, úi jacorúiyube boje muje táuturare, úi bueiye boje yópe apevu bueipóeva ne ðaiyepe”, úbenina aivubuya. Úbenita ye ámeina tebevu yu, ji jacorube boje táuturare, ji bueiye boje Jümenijicú yávaiye méne. Quéhora yópe muje cáchinocacupe teni, memecacu ji ruuáque, íni bojedacuyu yure jauéde. Que teni coreóvare ðacacu mujare bojecubeda Jesús úi yávaiye méne, úi meadaiyede mujare muje úmei bojecubeda. Que teni mujare yópe ji ruenocavupe tede ðacacu, mujare meimeiye jaube boje, muje jibenajiyere ayu yure jauéde. ⁸Aru ji sue báquede muje ímaroi, buesuyu mujare, jacorúcasu apesu Jesúre ju aipóevare, apeno ímaroi cójivivaivure, ne táuturare, íni bojedacuyu yure jauéde. Náre bojedacójecacu yure, náre memecabecúvacari, memecacuyu mujare bojecubeda. ⁹Ji sue báquede mujaque, apenuma yure jauteavú. Úbenita ye apejéne jéniametecacu mujacacu cúinacure. Quéhora Macedonia ámicurijoborócanu majevu, ne ju aye boje Jesúre, ne daroimara

mácanu edaivu bácanu muje ímaroi, jima yure ne jiyede, ji íni bojedacuyiyepe aivu yure jauéde. Que baru dinumu mácaróre cárijovametecacu mujare, yure jaué boje. Aru mujare ye cárijovamesuyumu apenuma máre, yure jaué boje. ¹⁰Meavu ji dápiaru ji coyure muiyede bojecubeda Jesús úi yávaiye méne cainoa ímaroa, Acaya ámicurijoborócaróare. Yu coyuyubu mujare yávaiyede jávene. Yu Cristo jicubu. Que baru borocubevu yu. ¹¹Ji que coyúie boje, “Pablo ñjare úbebi” úbenina arí dápiabejará muja. Jáve avu mujare. Jümenijicu me coreóvaibi yure pare usure mujare.

¹²Yúcapúravu ðare nuquijivu yópe ji ðarí cómajie báquepe, muje coreóvarájiyepe ayu borocurivure ina muje táuturare jacorúivure, ne bueiye boje “Pablo memenu me ñjapedeca”, úbenina ne aiyede. ¹³Nárecabu “Ñjatumu Jesús úi yávaiye méne beorí coyúicójeimara” úbenina aivu. Úbenita Jesús úi yávaiye méne beorí coyúicójeimara jáve ámema. Quéhora póevare jujoavubu. Ne bajumia jáðovariduvubu yópe Jesús úi yávaiye méne beorí coyúicójeimarape. ¹⁴Ne que teiyede, cuavaiye jaubevu majare, Satanás úi teiye boje. Satanávacari úi baju majibi jáðovañu meacupe, yópe ángelepe. ¹⁵Que baru cuavaiye jaubevu majare Satanáre memecapóeva, ina “Ñjatumu Jesús úi yávaiye méne beorí coyúicójeimara” úbenina aivu, ne jáðovaiyede yópe mearo ðaivupe. Úbenita Jümenijicu ñájine ðacuyume ina jujoavivure yópe náre ñájine ðaiye jauépe, ne que ðaiye báque boje.

Pablo “¿Meacu bária?” úi aino árumecupe, Corintocavu ne coreóvarájiyepe ayu Jesús úi yávaiye méne beorí coyúicójeimarape teivure
(Hch 9.23-25, 14.5, 19, 16.22-23)

¹⁶Bedióva cojedeca jéniaivu mujare, muje arí dápiabenajiyere ayu yure árumecure. Úbenita “Pablo árumecubevu” arí dápiavu baru,

jápiajarā ji soyuqiyede. Yure máre, yópe ina “Ñujatamu Jesús ñi yávaiye méne beorí soyuicōjeimara” ũbenina aivũ, arí dápiavũ ji puenocavũ ne soyuiyere soyuicōjejara yure, “¿Meacu b́arica?” ji bajuma ji aquiyere aivũ.

¹⁷Maje jabocu Jesucristo iyepe paiye soyuiyede ye soyubejebu. Aru yure máre soyuicōjememí. Quénora ýavacari soyuyubu yópe ãrũmescu ñi soyuiyere. ¹⁸Nore muje yebare, “¿Meara ḿarica?” arí soyuivubuya ne bajumia, pōeva ne coreóvarájiyere aivũ ñamejare aru aipe ne ðaiyede ijáravui. Que baru yũ máre quédeca arí soyuyubu. ¹⁹Mujarecabu me majidivũ muje dápiaru. Que baru torojurivũ jápiadavũ ãrũmescũ. Aru ne soyuiyede napiyavũ muja. ²⁰Muja napiyavũ ina mujare ðaicōjeivure yópe ne cōjeimara majurórivure paivure. Napiyavũ ina ívure muje cavaede, aru ina jujovaivure mujare. Napiyavũ ina ãmeina jáivure mujare, “¿Parurivũ b́arica ñuja ne pueno?” arí dápiavure mujare yópe ne cãchinocavure. Aru napiyavũ ina jara boaivure muje jijecamure máre. ²¹Ji parube boje, ne nópe ðaiyere ðabetecacu mujare. ũbenita ji pueno náre me jápiadavũ muja. Que baru cuyevũ yũ, ji parube boje.

Pōeva “¿Meara ḿarica?” aivũ ne bajumia ãrũmescũ Jũmenijicui jáinore, ina jidũbevũva nópe aru, yũ máre jidũbecũva nópe soyuyubu. ²²Návacari “Hebreovatamu ñuja. Que baru judíova bajutamu aru hebreo ãmicuricamua yávaicamuare yávaivubu” aivũreca, yũ máre napedecabu. Návacari “Israel bácuí pãramenacavubu ñuja” aivũreca, yũ máre napedecabu. Návacari “Abraham mácuí pãramenacavubu ñuja” aivũreca, yũ máre napedecabu. ²³Aru návacari “Cristore memecavubu ñuja” aivũreca, yũ ne pueno memecayubu Cristore. ũbenita yópe ãrũmescũre yávayubu, que ayũ.

Memecacu yũ ne pueno. Jabova jēni jacoima yure ãmeina teivure jēni jacoĩnami jívui obedinũmuare,

ne pueno. Jabova jara popeicōjeima yure obedinũmuare, ne pueno. Yainíducacu yũ obedinũmuare ne pueno.

²⁴Soyuyubu mujare iye ji yainíduiye báquede. Cũinárũrũre painũmua baju ina judíovai jabova jara popeicōjeima yure ne treinta y nueve baju jara popeiyede ne boaime ãmacajeque ðaimeque. ²⁵Yóbecurĩnũmua baju ina Roma ãmicuró jaborócvũ jabova jara popeicōjeima yure jaradoque. Cũinára pōeva cũraboaque ðavarí boarí jaruvaiyurĩduima yure. Yóbecurĩnũmua baju jiadocũ uracũ ji nuicũ mácaró corí bíjiaiye báque boje, cãtecacu yũ jia uradaí, aru cũinára jorí, nurí coreni, maotecacu cũinãñamine aru cũinájárvure máre. ²⁶Apenũmuare cuscũncacu yũ joai, soyũcũyũ Jesús ñi yávaiye méne obediĩmaroai. Aru ji cuscũniyede, ñájicacu pare. Apenũmuare bejarí bíjaríducacu ji jataríduiyede jia yaboiyede. Apenũmuare tatorí ñavaipōeva ji cavaede ñni ñavariduíma. Apenũmuare apevũ ji pōeva, judíovacavũ, ãmedaima yure. Aru apenũmuare ina judíova ãmescavũ ãmedaima yure. Apenũmuare ji cuede ĩmaroai, apenũmuare pōescubenoí, aru apenũmuare jia uradaí máre ñájicacu yũ. Aru pōeva ũbenina “mũ, ñujescu”, borocurivũ arí, Jesúre ju aipōevape teni, na máre ãmedaima yure. ²⁷Apenũmuare pare memecacu yũ pu uetuyũ baju, eacũyũ tãuturare, bojedacũyũ yure jauéde. Obedinũmuare cãmetecacu, ji memeiye boje. Avné ijiteavũ yure aru cũinóavũ yure máre. Apenũmuare ãiyede cãvabotecacu. Apenũmuare ji curĩñamine cãvabotecacu. Aru apenũmuare cuitótecaje jauteavũ yure. ²⁸Aru apede máre ñájicacu yũ. ũbenita caiye iye pueno, járvua coapa ñájivaivũ yũ, ji cãrijíye boje cainoa ĩmaroacavũ Jesúre ju aipōeva cójjíivaivure. ²⁹Cũinãcu nácacu ñi parũbedu ñi ju aiyede Jesúre, chĩori vaivũ yũ pare. Aru cũinãcu nácacu apescũ jujovaimũ mácu ãmeina tedu, yávacari cãrijini ñájivũ pare.

jauéde, apevu yure maucuvári ne ñájjine ðaiyede yure, aru ji cárijiyede. Caiye iye ámeno vaiyede yure Cristo jicu bae boje, “Meavu yure” ayu, torojavu yu. Ji parube boje, majivu Cristo cadateyure yure ji ðaiyede ùi parué majiéque.

**Pablo ùi cárijino Corintocavu
Jesúre ju aipðevare boje**

¹¹ Ji nópe toivaicðejiye boje apecure, árumecupe teivu yu. Ùbenita jauteavũ yure, muje jápaiye boje ina Jesús ùi yávaiye méne beorí coyucðeimarape teniduvu ne borocurí coyuiyede Jesús ùi yávaiye ména aru yurá máre. Ñamene yure aru yéde ji paruéde coyuiye jauřiduavũ mujare. Ùbenita muje coyube boje, coyuiye jauteavũ yure ji bajuma. Na “Pablo bojecubecube”, ùbenina ávaivubuya. Ùbenita yu bojecubecuvacari, ye ne cãchinocacu ámevu yu. Aru ji rueno meara ámema na. ¹² Ji cue báquede mujaque Jümenijicu yure ðare ðáme pøeva ne jámene, ne ðarí majibede, aru ape paruéque ðaiyede máre, jáðovacuyu yure jáve Jesús ùi yávaiye méne beorí coyucðejeimu bajure. Caiye iye ji ðaiyede napini ðacacu yu. ¹³ Yu ámevu apevu ne cãchinocacu. Quédeca mujacarpuravu máre ámevu apevu Jesúre ju aipðeva cójjivaiyu ne cãchinocavu ji jáinore. Mearo ðacaiyede ye ðabetecacu yu rueno baju apevure boje muje rueno. Jáve jëniametecacu muje táuturare, yópe ji jëniayepere apevu Jesúre ju aipðeva cójjivaiyure. Ùbenita, “Pablo ñujare ámeina jáñumebu”, ùbenina arí ðápiabejará muja. Muje ubedu ji jëniame máquede muje táuturare, chíori jëniañumu muje árumenajiyepere ayu diede.

¹⁴ Javede ruque jácunucacu mujare. Aru caride meadáyubu ji cuvede, jácunucuyu mujare bedióva cojedeca. Aru yópe jipocai ji ðaiye báqueredeca, jëniamescuyumu muje táuturare. Muje cuvade cuvaiyubevu yu. Quénora cuvaiyuvu yu mujare Cristo jinava. Mujarecabu yópe jímarape

yure. Ùbenita mamara ámevurecabu bojedacaiyu nébucuvare ne árajiveva. Quénora nébucuvarecabu bojedacaiyu némarare ne árajiveva. Que baru yu jacopuiyubevu muje táuturare. ¹⁵ Yu torojucu baju jícuymu caiye ji cuvade aru ji bajure máre, cadatecuyu mujare, ji ue boje mujare. Ùbenita mujare rueno baju ure nuñureca yu, mujacarpuravu ji jáinore quíjjino baju ure nuivubu yure.

¹⁶ Apevu mujaque curivu, yópe arí, ámecorovaivubuya yure: “Jáve Pablo jëniame mi ñuje táuturare. Ùbenita jujovarí iñume ñuje táuturare majibeñva”, ávaivubuya. ¹⁷ ¿Aipe ðarí mujare jujovarí, iñu buojari yu muje táuturare? ¿Muje dápiaru, ina ji jaroimara mácavure jujovaicðeiarí mujare? ¹⁸ Titore jëniacacu parurðeca, ùi nuquiyepere ayu muje yebai. Aru jarocacu apecu majecu Jesúre ju aipðecure éque. ¿Muje dápiaru, Titojá jujovarí mujare? Muja me majidivubu jáve Titojá jujovabevu bácavure mujare. Me majivu yu náre, yuredeca, cainumua mearore dápiavure aru mearore ðavure máre. Que baru ñuja ye jujovabevu mujare.

¹⁹ Caiye iye ji toivaicðejiyede apecure mujare jári boroteivu bácavu dápiabejará muja coyuyure ñuje ðaiyede, muje arí coyurájiyepere ayu “Meavu” o “Meamevu”. Muja ámevurecabu coyurájivu méne o meamene ñuje ðaiyede. Quénora Jümenijicurecabe coyucuyu diede ñujare. Ùbenita caiye iye ji toivaicðejiyepere apecure coyuyubu yu Jümenijicui jáinore, ji cue boje Cristoque cúinávure, muje parure nurajiyepere ayu muje úmei. Que baru muja, jívu, caiye ñuje ðaiyeque cadateiyurivubu mujare. ²⁰ Jidavu yu ji copaidaquiyede muje yebai, apevu mujacavu ðabevu bárájjivure yópe mujare jauépe. Apevu jararí pare áðamateiyurájjichuma. Aru apevu tebutenajjjichuma. Apevu jijatenaajjjichuma ùbenina. Apevu ðarájjichuma ne baju urópe dápiabeñva mearore o ámenore apevure. Apevu coyurájjichuma

āmenore caivn ne jāpiayede apevni borore. Apevu yávarājichuma jāpiabenoi āmenore apevni borore. Apevu “¿Meara mārca apevu pueno?” arī dāpiarājichuma. Aru apevu maucavari, cārijovari, boaiyurājichuma apevure.

Mujacavn ne nōpe đaru, ji copaidaquiyede torojubecuyumu yu. Aru muja máre torojubenajaramu, ji jararī nājine đaquie boje mujare, muje nōpe āmeina teiye boje. ²¹Jidvnu yu ji copaidaquiyede muje yebai Jūmenijicu ji mearore jīmu cuyoje tede đacuyure yure bediova cojedeca muje jāinore. Apevu mujacavn curivubuya muje āmeimeque. Apevu mujacavn āmeina đarī curivubuya apevunque nēmarebucava āmevunque. Aru apevu mujacavn caino āmenore đaivubuya. Nōpe teni āmeina teima javede. Aru chiomeni oatvabenama cāreja ne đaiyede. Quénora āmeina tede nuivubuya. Chiomeni oatvabedu ji daquie jipocai, chiōri ocuyumu yu pare, náre boje.

**Pablo ūi majicaino aru meaicōjeino
Corintocavure
(Mt 18.16)**

13 ¹Ji eaquiyebu cari yóbecue ji eaiye jācunuiyede muje yebai. Yópe arī, toivaicōjenejaquemavn Jūmenijicu ūi yávaiyede: “Nai pōecu apevu ne boro coyurī adaimu maru, ‘Āmeina đayube’ aivn baru ūi borore, pucarā o yóbecurā o apevu máre majidivn bācavn ūi āmeina đaiye bāqueda boro coyuiye javn náre ūi borore”, arī toivaicōjenejaquemavn. ²Ji eaquie jipocamia muje yebai bediova cojedeca, parūrōreca coyuiyvun mujare yo paperayocaque ji cuede joai mujare jocarī. Ji cari eaquiyede napimecva jāve jararī nājine đacuyumu caivn mujacavn āmeina đare nuivure. Javede, ji pūque cue bāquede mujaque, quédeca coyucacu parūrōreca mujare. Coyucacu mujacavn āmeina đaivure ji eaquie jipocamia aru caivn apevure máre. ³Mujarecavu jēniaivn ji jādovaquiyepere aivn yure Cristoi coyucōjeimn

bajure. Ji eaquiyede jādovacuyumu jāve baju ji cūvaede Cristoi paruéde. Ūrecabe parūbecu āmecu. Quénora parucu bajutame. Que baru parure đacuyume yure muje jēneboi, ji nājine đaquiyepere ayu ūre ju aipōeva āmeina đarī cōmajivure. ⁴Cristo jādovamecu bācavacari ūi paruéde ne pēvari boarī jaruvaiye bāquede ūre jocusjaravena, caride apucu cubi Jūmenijicui paruéque. Ūpedeca nūja ūi yávaiye méne beorī coyucōjeimara, ūque curivn cūinávure, parubevnvacari, jādovarajaramu ūi paruéde nūje cūvaede, nūje nājine đarājiyede mujacavn ūre ju aipōeva āmeina đarī cōmajivure.

⁵Jārī corevajarā muja coapa muje baju, jādovarajivn ju are nuivure maje jabocu Jesucristore đajocavēvna o ūre ju aiyede đajocavn bācavure. Me dāpiarī corevajarā muje bajumia. Que teni coreóvarājaramu curivure Jesucristoque cūinávure, ūre ju aivn baru. Ūbenita ūre ju abevn baru, coreóvarājaramu cubevure ūque cūinávure. ⁶Muje coreóvarājiyede curivure Jesucristoque cūinávure, coreóvarājaramu nūjare, mujare coreóvare đaivn bācavure, ūi yávaiye méne beorī coyucōjeimara bajure. ⁷Nūje earājiyede, mujacavn āmeina đarī cōmajivn baru, muja coreóvarājaramu nūjare Jesús ūi yávaiye méne beorī coyucōjeimara bajure, nūje nājine đarājiye boje náre Cristoi paruéque. Ūbenita nūja jēniaivaivn Jūmenijicunque, muje āmeina đabenajiyepere aivn. Muje āmeina đarī cōmajibedu, namene ye nājine đabenajaramu nūja paruéque. Nūje paruéde jādovamenu, “Jesús ūi yávaiye méne beorī coyucōjeimara āmema”, ūbenina arī dāpiarājichvnu muja nūjare. Ye baju āmev nūjare. Pare ūrivubu nūja caiye pueno, muje mearore đarājiyepere aivn.

⁸Pōeva ne mearore đaiyede, đaivnbu yópe Jūmenijicui đaicōjeiyepere ūi yávaiye jāveque. Aru Cristo nūjare jādovaicōjememi ūi paruéde, nūje āmeina đarājiyepere ayu ina yávaiyede

jāvene đaipōevare. Quénora ñujare jádovaicōjeimi ñi paruéde, ñuje cađatenajiyeye ayu náre. ⁹Muje mearore đaiyede, parure ñuivubu muje ũmei. Aru mujare ñájine đaiye jaubevu ñujare. Que baru ñuja buojabenamu jádovaivu iye paruéde, Cristoi cāvare đaiyede ñujare. Aru parubevupe teivubu muje jáinore. Ũbenita parubevuvacari, torojuvu ñuja, muje parure ñuiye boje muje ũmei. Aru cainumua jēniavaivubu Jūmenijicuque, ñi parure nure đaquiyeye aivu mujare muje ũmei, pñ mujare ye jaubeta.

¹⁰Yo paperayocare toivaicōjeivu apesure mujare ji cuede joai mujare jocarī, muje meatenajiyeye ayu muje đaiyede, ji equiyeye jipocamia muje yebai. Que tedu, mujare ñájine đaiye jaubequiyebu yure, yópe Cristoi đaicōjeiyeye yure caivu ũre ju aipōevare āmeina đarī cōmajivure. Ũrecabe parure đabecu ñujare, ñuje chīore đarī, đajocare đarājiyeye ayu

pōevare ne ju aiyede ũre. Quénora parure đaiibi ñujare, ñuje torojure đarī, parure đarājiyeye ayu náre ne ju aiyede ũre.

¹¹Muja, jivu, quénoramu caride. Meatejarā muje đaiyede. Aru cainumua pueno baju mearore đare mujara muja. Me jápiarī ju ajarā ji coyuyede mujare. Cūináturu muje ũme me cujarā caivu muja cūináturu. Cārijimenoque me cujarā muja. Que đaru, Jūmenijicu, ñai majare ucu aru majare cārijimenoque cure đayū, cūcuyume mujaque. ¹²Me jacoyjarā muja mujevure muje jivare nuri, muje Jūmenijicu jina mae boje. ¹³Caivu Jesúre ju aipōeva yore curivu meaicōjedama mujare. ¹⁴Maje jabocu Jesucristo mearo đacajacurī mujare bojecubeda ñi me boje. Majepacu Jūmenijicu, mujare ucu, ure đajacurī mujare. Aru ñai Espiritu Santo yóvajacurī mujare cūinávupe. Quénoramu.